

**BOSNA I HERCEGOVINA**  
**FEDERACIJA BOSNE I HERCEGOVINE**  
**UNSKO-SANSKI KANTON**  
**GRAD BIHAĆ**  
**GRADONAČELNIK**

Broj:04/1-19-5-42/22

Bihać, 14.01.2022. godine

Na osnovu člana 183. stav (2) Poslovnika Gradskog vijeća Bihać („Službeni glasnik Grada Bihaća“ br: 3/16, 4/20), Gradonačelnik Bihaća u svojstvu predlagača propisa i drugih akata

**O D R E Đ U J E**

Izvjestioca: Vildanu Zulić, pomoćnika gradonačelnika za strateško planiranje, upravljanje projektima, komunalne djelatnosti, vode i zaštitu okoliša na sjednici Gradskog vijeća i radnim tijelima po prijedlogu tačke dnevnog reda:

- Prijedlog Odluke o izmjenama i dopunama Odluke o komunalnom redu

Gradonačelnik  
Šuhret Fazlić

**BOSNA I HERCEGOVINA**  
**FEDERACIJA BOSNE I HERCEGOVINE**  
**UNSKO-SANSKI KANTON**  
**GRAD BIHAĆ**  
**GRADONAČELNIK**

Služba za strateško planiranje, upravljanje projektima,  
komunalne djelatnosti, vode i zaštitu okoliša

Broj: 04/1-19-5-42/22

Bihać, 14.01.2022. godine

Gradsko vijeće Bihać

- o v d j e -

PREDMET: Prijedlog Odluke o izmjenama i dopunama Odluke o komunalnom redu,  
dostavlja se

Na osnovu člana 52. tačka a) Statuta Grada Bihaća ("Službeni glasnik Grada Bihaća", br: 13/15, 13/18), a u vezi sa članom 140. Poslovnika o radu Gradskog vijeća Grada Bihaća („Službeni glasnik Grada Bihaća“, br. 3/16, 4/20), u prilogu vam dostavljam Prijedlog Odluke o izmjenama i dopunama Odluke o komunalnom redu.

*Pravni osnov za donošenje*

Pravni osnov za donošenje Prijedloga Odluke o izmjenama i dopunama Odluke o komunalnom redu sadržan je:

- u članu 67. Zakona o komunalnim djelatnostima ("Službeni glasnik USK", br. 4/11, 11/11, 6/12, 13/12, 14/17), kojim je, između ostalog, propisano da je općina obavezna donijeti Odluku o komunalnom redu,

- u članu 35. tačka c) Statuta Grada Bihaća ("Službeni glasnik Grada Bihaća", br: 13/15, 13/18), kojim je propisano da Gradsko vijeće donosi odluke i druge opće akte kojima uređuje pitanja iz samoupravnog djelokruga grada i daje njihovo tumačenje.

*Razlozi donošenja*

Izmjenama i dopunama važeće Odluke o komunalnom redu („Službeni glasnik Grada Bihaća“, br: 12/18 i 8/21) pristupilo se radi zaprimljene Inicijative JU „Zavod za prostorno uređenje“ Bihać, broj: 0103/08-19-188/22 od 12.01.2022. godine, kojom se predlažu izmjene važeće Odluke na način da se propiše odredba kojom će se regulisati odgovornost za štete nastale trećim licima u slučaju kada do štete dođe radi nepredviđenih okolnosti, te se predlažu izmjene u smislu usklađivanja Odluke o komunalnom redu sa osnivačkim aktima javnih preduzeća. Razmatrajući navedenu inicijativu, predlagač istu u većem dijelu smatra opravdanom, radi čega su prijedlozi ugrađeni u predloženi tekst, na način:

1) da je Odluka dopunjena novim članovima 4a, 4b i 4c., iz kojih proizilazi pravni osnov za zaključenje Ugovora o obavljanju povjerenih djelatnosti zajedničke komunalne potrošnje, između JU “Zavod za prostorno uređenje” Bihać, sa jedne strane i JKP „Komrad“ d.o.o. Bihać i JP „Vodovod“ d.o.o. Bihać, sa druge strane kojima je povjereno obavljanje komunalnih djelatnosti zajedničke komunalne potrošnje, sadržina ugovora, te način ponašanja u obavljanju poslova zajedničke komunalne potrošnje,

2) nadalje, Odluka je dopunjena novim članom 4d., kojim se propisuje odgovornost za štetu učinjenu trećim licima u tri različite situacije, i to: u slučaju da se od strane potpisnika Ugovora ne ispunjavaju obaveze propisane Odlukom o komunalnom redu, u slučaju štete nastale usljed nepredviđenih okolnosti, odnosno okolnosti koje se kod zaključenja Ugovora nisu mogle predvidjeti, spriječiti, izbjeći ili otkloniti, te štete u slučaju kada je proglašeno stanje prirodne ili druge nesreće.

Na predloženi način prihvaćen je prijedlog JU “Zavod za prostorno uređenje” Bihać i JKP „Komrad“ d.o.o. Bihać, da Grad Bihać preuzme odgovornost za štetu koja nastane usljed nepredviđenih okolnosti, odnosno okolnosti koje se kod zaključenja Ugovora nisu mogle predvidjeti, niti su se mogle spriječiti, izbjeći ili otkloniti, a prema dosadašnjoj sudskoj praksi za štetu nastalu u ovakvim slučajevima proglašavani su odgovornim i strankama su je bili dužni namiriti JU “Zavod za prostorno uređenje” Bihać i JKP „Komrad“ d.o.o. Bihać,

3) također, predloženim tekstom Odluke otklonjeni su propusti načinjeni u tekstu člana 38., 58. i 64., jer je nesporno da poslove navedene u ovim članovima ne vrši JU “Zavod za prostorno uređenje” Bihać, nego JKP „Komrad“ d.o.o. Bihać,

4) primjedbe vezane za uklanjanje snijega i leda su djelimično prihvaćene, obzirom da je Odlukom potrebno jasno definisati obaveze JKP „Komrad“ d.o.o. Bihać i drugih pravnih lica koji vrše ove poslove, kao i obaveze JU “Zavod za prostorno uređenje” Bihać, koja je dužna putem navedenih pravnih lica osigurati provođenje Operativnog programa zimskog održavanja gradskih ulica, dijela javnih površina, lokalnih i nerazvrstanih cesta.

#### *Potrebna finansijska sredstva*

Za provođenje ove Odluke potrebno je obezbjediti finansijska sredstva u Budžetu Grada Bihaća, cca. 20.000,00 KM.

Radi gore navedenog, predlažem Gradskom vijeću usvajanje Prijedloga Odluke o izmjenama i dopunama Odluke o komunalnom redu, kao u predloženom tekstu.

#### Prilog:

- Prijedlog Odluke o izmjenama i dopunama Odluke o komunalnom redu
- Odluka o komunalnom redu (“Sl. glasnik Grada Bihaća”, br. 12/18, 8/21)
- Inicijativa JU „Zavod za prostorno uređenje” Bihać od 12.01.2022. godine

Obradivač:  
Elvira Hadžić

Gradonačelnik  
Šuhret Fazlić

Na osnovu člana 67. Zakona o komunalnim djelatnostima („Službeni glasnik Unsko-sanskog kantona", br: 4/11, 11/11, 6/12, 13/12 i 14/17) i člana 35. tačka c) („Službeni glasnik Grada Bihaća“ broj:13/15, 13/18), Gradsko vijeće Bihać na \_\_\_\_\_ sjednici održanoj dana \_\_\_\_\_, 2022. godine, donijelo je:

Odluku o izmjenama i dopunama  
Odluke o komunalnom redu

Član 1.

U Odluci o komunalnom redu („Službeni glasnik Grada Bihaća“, br: 12/18 i 8/21), iza člana 4., dodaju se novi članovi 4a., 4b., 4c. i 4d., koji glase:

„Član 4a.

(Program obavljanja komunalnih djelatnosti  
zajedničke komunalne potrošnje)

Javna ustanova “Zavod za prostorno uređenje” Bihać, kojoj su prenešena javna ovlaštenja i povjereni stručni i upravni poslovi iz oblasti komunalnih djelatnosti zajedničke komunalne potrošnje, za svaku kalendarsku godinu utvrđuje Program obavljanja komunalnih djelatnosti zajedničke komunalne potrošnje, kojeg usvaja Gradsko vijeće Bihać (u daljem tekstu: Program).

Član 4b.

(Ugovor o obavljanju komunalnih djelatnosti  
zajedničke komunalne potrošnje)

(1) Relizacija Programa iz člana 4a. ove Odluke, u dijelu povjerenih poslova zajedničke komunalne potrošnje vrši se u skladu sa Ugovorom o obavljanju povjerenih djelatnosti zajedničke komunalne potrošnje, kojeg JU “Zavod za prostorno uređenje” Bihać zaključuje sa JKP „Komrad“ d.o.o. Bihać i JP „Vodovod“ d.o.o. Bihać, kojima je osnivačkim aktima povjereno obavljanje komunalnih djelatnosti zajedničke komunalne potrošnje.

(2) Ugovor iz stava (1) ovog člana sadrži odredbe kojima se uređuju predmet, cijena i rokovi izvršenja ugovorenih poslova, obaveze JU “Zavod za prostorno uređenje” Bihać, kao naručioca posla, te JKP „Komrad“ d.o.o. Bihać i JP „Vodovod“ d.o.o. Bihać, kao izvršioca poslova, prava i dužnosti nadzornog organa, te način plaćanja i primopredaje izvršenih poslova.

(3) Ugovor iz stava (1) ovog člana zaključuje se za period za koji je donešen Budžet Grada Bihaća, a izvršava se u skladu sa cijenama povjerenih komunalnih usluga zajedničke komunalne potrošnje na koje, po prijedlogu JU “Zavod za prostorno uređenje” Bihać, svake godine saglasnost daje Gradsko vijeće Bihać.

#### Član 4c.

##### (Vršenje poslova)

JU "Zavod za prostorno uređenje" Bihać, JKP „Komrad“ d.o.o. Bihać i JP „Vodovod“ d.o.o. Bihać, u vršenju poslova propisanih ovom Odlukom i poslova utvrđenih u ugovoru iz člana 4b. ove Odluke dužni su da postupaju sa povećanom pažnjom, prema pravilima struke i običajima.

#### Član 4d.

##### (Naknada štete)

(1) Ukoliko pravna lica iz člana 4c. ove Odluke, ne ispunjavaju obaveze, odnosno ne vrše poslove na način propisan Odlukom o komunalnom redu i u skladu sa zaključenim ugovorom iz člana 4b. Ove Odluke, snose odgovornost u slučaju nastanka štete trećim licima.

(2) Grad Bihać snosi odgovornost za štetu nastalu trećim licima usljed okolnosti koje se zaključenjem ugovora iz člana 4b. ove Odluke nisu mogle predvidjeti, odnosno okolnosti koje se nisu mogle spriječiti, izbjeći ili otkloniti.

(3) Za štetu prouzrokovanu trećim licima u slučaju proglašenja stanja prirodne ili druge nesreće, odgovornost snosi Grad Bihać, a sredstva za naknadu štete se obezbjeđuju na način i u postupku koji je propisan Zakonom o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije bih", br. 39/03, 22/06 i 43/10).“

#### Član 2.

U članu 38. stavu (3), članu 58. stavu (1) i (4) i članu 64. stavu (2), riječ: „Zavod“ zamjenjuje se riječima: „JKP „Komrad“ d.o.o. Bihać“.

#### Član 3.

U članu 50. stav (2) mijenja se i glasi:

„(2) Brigu o održavanju javnih saobraćajnih površina vodi Zavod, kao upravitelj lokalnih cesta, gradskih ulica i nerazvrstanih cesta na području grada Bihaća.“

#### Član 4.

U članu 51. stavu (1) briše se interpunkcijski znak „tačka“ i dodaje interpunkcijski znak „zarez“ i riječi: „tako da iste budu uredne i čiste i da služe svrsi za koju su namijenjene.

#### Član 5.

Članovi 62. i 97., brišu se.

#### Član 6.

U članu 91. stav (1) i (2) mijenjaju se i glase:

„(1) Snijeg i led se sa javnih saobraćajnih površina uklanja kontinuirano, u cilju stalne prohodnosti i prema prioritetima utvrđenim u Operativnom programu radova zimskog održavanja.

(2) Snijeg i led sa javnih saobraćajnih površina, čiji je upravitelj JU „Zavod za prostorno uređenje“ Bihać, uklanjaju:

- a) JKP „Komrad“ d.o.o. Bihać, u dijelu povjerenih poslova, za urbane zone na području grada Bihaća, i
- b) pravna lica, nakon provedenog postupka javnih nabavki u skladu sa Zakonom o javnim nabavkama BiH („Službeni glasnik BiH“, broj: 39/14), za van urbano područje grada Bihaća.“

#### Član 7.

Član 92. mijenja se i glasi:

#### „Član 92.

Zavod je dužan da, putem pravnih lica navedenih u članu 91. stav (2) ove Odluke osigura provođenje Operativnog programa zimskog održavanja gradskih ulica, dijela javnih površina, lokalnih i nerazvrstanih cesta, na način da se trotoari i kolovoz posipaju dozvoljenim posipnim materijalom, po prestanku padavina kako bi se saobraćaj i kretanje pješaka na javnim saobraćajnim površinama odvijali normalno.“

#### Član 8.

Ova Odluka stupa na snagu osmog dana od dana objavljivanja u „Službenom glasniku Grada Bihaća“.

Broj \_\_\_\_\_  
Bihać, \_\_\_\_\_ .2022. godine

Predsjedavajući Gradskog vijeća  
Zulfikar Handukić



# SLUŽBENI GLASNIK

## GRADA BIHAĆA

Broj 12 / 2018.

17. decembar 2018.  
BIHAĆ

Izdanje na bosanskom  
jeziku

272.

Na osnovu člana 64. stav (2) tačka j) Poslovnika Gradskog vijeća Bihać („Službeni glasnik Grada Bihaća“, br: 3/16), Statutarna komisija na sjednici održanoj dana 08.11.2018. godine, utvrdila je

### ODLUKU

#### O KOMUNALNOM REDU

#### -PREČIŠĆENI TEKST-

#### DIO PRVI-OPĆE ODREDBE

##### Član 1.

##### (Predmet Odluke )

Odlukom o komunalnom redu ( u daljem tekstu: Odluka) uređuju se komunalne djelatnosti zajedničke komunalne potrošnje čije se obavljanje odnosi na komunalni red, odnosno na javne površine i to:

- a) uređenje naselja
- b) održavanje čistoće, čuvanje i korištenje javnih površina,
- c) odvođenje atmosferskih i drugih voda sa javnih površina,
- d) uklanjanje snijega i leda,
- e) upravljanje objektima i uređajima javne rasvjete,
- f) uklanjanje protupravno postavljenih predmeta,
- g) higijeničarska služba, dezinfekcija i deratizacija,
- h) mjere za provođenje komunalnog reda,
- i) rad komunalnih redara,

- j) nadzor na provođenjem odredaba ove Odluke,
- k) kaznene odredbe za prekršioce odredaba ove Odluke,
- l) prelazne odredbe,
- m) završne odredbe.

##### Član 2.

##### (Značenje pojedinih pojmova)

(1) Javne površine su površine u općoj upotrebi, a prema namjeni se razlikuju:

- a) javne saobraćajne površine (lokalne ceste, gradske ulice i nerazvrstane ceste, na kojima se odvija saobraćaj i zaštitni pojas uz njih, trgovi, mostovi, pješački prolazi kroz zgrade i između zgrada, prilazi zgradama namijenjeni javnoj upotrebi, pothodnici, nathodnici, tuneli, javna stepeništa, skverovi, javna parkirališta, pločnici, trotoari, pješačke i biciklističke staze, benzinske stanice, stajališta javnog autobusnog saobraćaja, taksi stajališta, kao i ostale površine javnog saobraćaja i saobraćaja u mirovanju),
- b) javne zelene površine (parkovi, zelene površine na trgovima, uz javne saobraćajne površine, uz objekte javne namjene, oko stambenih zgrada u stambenim naseljima, uz obale rijeka i vodotoka, na dječijim igralištima, živice i žive ograde, cvijetnjaci, travnjaci, odmorišta i staze koje su sastavni dijelovi zelenih površina, i ostale slične površine),
- c) ostale površine uz sportske i rekreacione objekte i prostore povezane sa tim objektima, javna kupališta i bazeni, površine uz objekte namijenjene za javne priredbe,
- d) prostori uz željezničke i autobusne stanice, spomen područja, i slični prostori,

e) otvoreni pijačni i tržni prostori i prostori oko prodajnih objekata, gradske česme, fontane i spomen obilježja.

(2) Pokretnom napravom smatra se lako prenosivi objekat koji služi :

- a) za prodaju određene robe ili za vršenje određenih usluga: štandovi, tezge, klupe, stolovi, automati i naprave za prodaju raznih artikala, rashladni uređaji za prodaju pića, napitaka i sladoleda, ugostiteljske i druge prikolice, naprave za pečenje kestena, kokica, pomfrita, palačinkama i slične naprave za čišćenje obuće, vaganje i slično,
- b) u svrhu organiziranja otvorenih terasa ugostiteljskih objekata (stolice, cvjetne vaze, suncobrani, tende, pokretne ograde i ostala oprema u svrhu obavljanja ugostiteljske djelatnosti),
- c) u svrhu prezentiranja prodajnog asortimana ispred zanatskih i drugih poslovnih radnji, prezentacija dobitaka lutrije, nagradnih igara i slično,
- d) u svrhu organiziranja zabava (cirkuski šatori, luna parkovi, zabavne radnje i slično), i manifestacija za vrijeme državnih praznika, vjerskih blagdana, godišnjica, sportskih događaja i drugih manifestacija, odnosno u druge svrhe reklamnog sadržaja.

(3) Firma je ime pod kojim pravno ili fizičko lice posluje.

### **Član 3.**

#### **(Gramatička terminologija)**

Gramatička terminologija korištenja muškog ili ženskog spola podrazumijeva uključivanje oba spola.

### **Član 4.**

#### **(Komunalni red)**

(1) Komunalni red podrazumijeva skup svih ponašanja i aktivnosti u cilju pravilnog uređenja, održavanja, korištenja, zaštite i očuvanja javnih površina u općoj upotrebi.

(2) Odlukom o komunalnom redu uređuju se način, uslovi i mjere za održavanje optimalnog nivoa komunalne higijene i drugih uslova života i rada ljudi na području Grada Bihaća.

(3) Komunalni red, propisan ovom Odlukom, obavezan je za sva fizička lica, fizička lica koja samostalno obavljaju djelatnost ličnim radom (samostalni privrednik) i pravna lica.

## **DIO DRUGI-UREĐENJE NASELJA**

### **POGLAVLJE I-AKTIVNOSTI NA UREĐENJU NASELJA**

#### **Član 5.**

##### **(Uređenje naselja)**

(1) Naselja na području Grada Bihaća moraju biti uređena.

(2) Pod uređenjem naselja, u smislu ove Odluke, podrazumijevaju se sve aktivnosti koje su vezane i usmjerene na korištenje, održavanje i uređenje javnih površina i objekata na njima i to:

- a) postavljanje i održavanje urbane opreme na javnim površinama,
- b) održavanje željezničkih i autobusnih stanica, pijaca, rekreacionih površina i javnih sportskih igrališta,
- c) dekoracija i uređenje grada za posebne prigode,
- d) uređivanje fasada, krovova i ostalih dijelova zgrada,
- e) uređenje ograda, vrtova, dvorišta, voćnjaka i sličnih površina.

#### **Član 6.**

##### **(Prostorno planska dokumentacija)**

Naselja se uređuju i održavaju urednim, u skladu sa prostorno planskom dokumentacijom, odredbama ove Odluke i drugih propisa.

### **POGLAVLJE II -POSTAVLJANJE I ODRŽAVANJE URBANE OPREME NA JAVNIM POVRŠINAMA**

#### **Odjeljak A. URBANA OPREMA**

#### **Član 7.**

##### **(Pojam urbane opreme)**

(1) Pod urbanom opremom podrazumijevaju se svi objekti i inventar koji se nalazi na javnim površinama iz člana 2. stava (1) ove Odluke i obuhvata: urbani mobilijar i komunalne objekte i uređaje u općoj upotrebi.

(2) Urbana oprema služi svim građanima, odnosno boljem funkcioniranju naselja, kao urbane cjeline i postavlja se samo na način da svojim položajem i smještajem što bolje udovolji svrsi i namjeni za koju se postavlja.

#### **Član 8.**

##### **(Postavljanje urbane opreme)**

(1) Postavljanje, održavanje i uređivanje objekata i uređaja javne urbane opreme vrši JKP „Komrad“ d.o.o. Bihać i JP „Vodovod“ d.o.o. Bihać, svako u okviru povjerenih mu poslova



komunalnih djelatnosti zajedničke komunalne potrošnje.

(2) Urbana oprema iz člana 7. stav (1) ove Odluke mora biti postavljena na način da ne ugrožava sigurnost ljudi i imovine.

#### **Član 9.**

(Održavanje urbane opreme)

(1) Vlasnici urbane opreme, odnosno ovlaštena pravna ili fizička lica kojima je ista data na upravljanje, korištenje, u zakup i slično moraju istu održavati u urednom i ispravnom stanju.

(2) Zabranjeno je urbanu opremu koristiti u druge svrhe, osim one koja je navedena u urbanističko-tehničkim uslovima, utvrđenim od strane Službe za urbanističko planiranje i građenje.

### **Odjeljak B. URBANI MOBILIJAR**

#### **Član 10.**

(Pojam urbanog mobilijara)

Urbanu mobilijar, kao element urbane opreme, podrazumijeva javni inventar, objekte i uređaje koji su postavljeni na javnim površinama i nemaju komunalnu funkciju, a čine ga: klupe za sjedenje, stalci za bicikle, oprema za dodatnu regulaciju saobraćaja, putokazi, reklame, reklamni natpisi, izlozi, plakati i oglasi, javni satovi, javne telefonske govornice poštanski sandučići, ukrasne žardinjere, pokretne naprave i drugi urbani mobilijar.

#### **Član 11.**

(Klupe za sjedenje)

(1) Postavljanje, održavanje i zamjenu klupa za sjedenje vrši JKP „Komrad“ d.o.o. Bihać, na osnovu urbanističko-tehničkih uslova, utvrđenih od strane Službe za urbanističko planiranje i građenje.

(2) Zabranjeno je oštećivanje, šaranje, prljanje, premještanje, sjedenje na naslonjačima klupa za sjedenje.

#### **Član 12.**

(Stalci za bicikle)

(1) Na javnim saobraćajnim površinama u zonama većeg kretanja i zadržavanja građana mogu se postavljati stalci za bicikle.

(2) Postavljanje, održavanje i zamjenu stalaka za bicikle vrši JKP „Komrad“ d.o.o. Bihać, na osnovu urbanističko-tehničkih uslova, utvrđenih od strane Službe za urbanističko planiranje i građenje.

(3) Vlasnik postavljenog stalka dužan je isti održavati u urednom i ispravnom stanju.

#### **Član 13.**

(Oprema za dodatnu regulaciju saobraćaja i putokazi)

(1) Pod opremom za dodatnu regulaciju saobraćaja u smislu ove Odluke podrazumjevaju se zaštitni stubi (metalni ili betonski), zaštitne ograde, i slično.

(2) Putokazi koji nisu određeni posebnim propisima, a služe u svrhu usmjeravanja građana prema određenim institucijama, mogu se postavljati na javnim površinama i objektima u vlasništvu pravnih ili fizičkih lica.

(3) Putokazi iz stava (2) ovog člana, moraju biti pravougaoni ili pravougaoni koji završavaju strelasto, maksimalnih dimenzija 80 x 30 cm, najniže visine od nivoa podloge 220 cm, a sadrže naziv institucije i njenu djelatnost.

(4) Oprema za dodatnu regulaciju saobraćaja i putokazi postavljaju se na osnovu urbanističko-tehničkih uslova, utvrđenih od strane Službe za urbanističko planiranje i građenje.

(5) Zabranjeno je oštećivanje, šaranje, prljanje, premještanje, plakatiranje i lomljenje opreme za dodatnu regulaciju i putokaza.

#### **Član 14.**

(Izlog)

(1) Izlozi služe za izlaganje robe i moraju biti tehnički i estetski oblikovani, odgovarajuće osvijetljeni i u skladu sa izgledom zgrade i okoliša, a postavljaju se tako da ne onemogućavaju ili otežavaju korištenje javnih površina.

(2) Svi izlozi moraju biti osvijetljeni sopstvenom svjetlošću odgovarajuće snage, s tim što izvor svjetlosti ne smije biti okrenut prema prednjoj strani izloga (ulično staklo).

(3) Izlozi moraju biti osvijetljeni cijele noći u skladu sa režimom rada javne rasvjete, osim u slučajevima štednje električne energije i drugim vanrednim okolnostima.

(4) Zabranjeno je na izlozima postavljanje tendi, roletna, rešetki i slično, bez prethodno pribavljenih urbanističko-tehničkih uslova, od strane Službe za urbanističko planiranje i građenje.

### **Član 15. (Održavanje izloga)**

(1) Vlasnici odnosno korisnici izloga dužni su ih držati urednim i čistim, i u njima se ne smije držati ambalaža ili skladištiti roba.

(2) Zabranjeno je uništavati izloge, plakate, po njima ispisivati poruke, obavijesti, crtati, šarati ili na drugi način prljati i narušavati izgled.

(3) Vlasnik odnosno korisnik izloga čiji se poslovni prostor ne koristi dužan ga je pokriti neprozirnim materijalom, prekriti platnom ili na drugi način onemogućiti pogled u unutrašnjost poslovnog prostora.

(4) Izlaganje robe izvan izloga, na vrata i prozore poslovnih prostorija, okvire izloga, pročelja zgrada i na javnim površinama ispred poslovnih prostorija, vrši se uz prethodno pribavljeno odobrenje Službe za komunalne djelatnosti, vode i zaštitu okoliša.

(5) U izloge se ne smiju postavljati oglasi, plakati i slično, koji nisu vezani s djelatnošću, vlasnika, odnosno korisnika izloga, osim privremenih obavijesti o prigodnim djelatnostima trgovine.

### **Član 16. (Uređenje izloga)**

Stvari, cijene, cjenovnici, ukrasi i slično, u izlozima moraju biti izloženi estetski i stručno, na način koji jasno iskazuje djelatnost.

### **Član 17. (Reklamni natpis )**

(1) Pod reklamnim natpisom, u smislu ove Odluke, podrazumijevaju se sve vrste istaknutih natpisa, kojima se reklamiraju proizvodi, usluge i dobra i to:

- 1) reklamni pano,
- 2) samostojeći reklamni pano (city light, billboard, bigboard, megaboard, totem, wallscape, display i sl),
- 3) reklama na stubovima javne rasvjete,
- 4) reklamni ormarić ili vitrina,
- 5) pokretni reklamni pano,
- 6) transparent,
- 7) reklama na tendama,
- 8) jarbol sa reklamnom zastavom,
- 9) reklamni sadržaj, poruka ili informacija, koja je oslikana, ljepljena, pisana ili otisnuta na fasadi građevina ili izlozima poslovnih prostora.

(2) Reklamnim natpisima, u smislu ove Odluke, ne smatraju se reklamni natpisi površine do 0,25 m<sup>2</sup> i reklamni natpisi istaknuti na poslovnim prostorima koji se nalaze unutar tržnog centra.

### **Član 18. (Postavljanje reklamnih natpisa)**

(1) Reklamni natpisi iz člana 17. ove Odluke postavljaju se na javnim površinama u skladu sa odredbama Odluke o privremenom korištenju javnih površina na području grada Bihaća («Službeni glasnik Grada Bihaća», br. 4/15), Planom lokacija za korištenje javnih površina na području grada Bihaća („Službeni glasnik Grada Bihaća“, br. 4/15, 6/15, 14/15, 6/16) i Programom lokacija za postavljanje reklamnih panoa tip zastavica broj 01/1-23-4-11282 od 15.12.2006. godine.

(2) Pravno, odnosno fizičko lice koje obavlja samostalnu djelatnost, postavlja reklamni natpis iz člana 17. ove Odluke, na objektu u kojem posluje ili ima sjedište, uz prethodno pribavljeno odobrenje Službe za komunalne djelatnosti, vode i zaštitu okoliša.

(3) Odobrenje iz stava (2) ovog člana izdaje se na osnovu urbanističko-tehničkih uslova, koje u skladu sa odredbama Zakona o prostornom uređenju i građenju USK-a, utvrdi Služba za urbanističko planiranje i građenje.

(4) Zabranjeno je postavljanje reklamnih natpisa na drveću, parkovskom zelenilu, saobraćajnim i drugim objektima koji imaju kulturnu i istorijsku vrijednost, vjerskim institucijama, mostovima, spomen obilježjima i sličnim objektima.

### **Član 19. (Održavanje reklamnih natpisa)**

(1) Reklamni natpisi na zgradi moraju biti čitljivi, tehnički i estetski oblikovani, uredni i jezično ispravni i ne smiju svjetlom ili zvukom ometati ostale korisnike zgrade u mirnom korištenju zgrade.

(2) Svjetleći reklamni natpisi moraju biti upaljeni cijele noći u skladu sa režimom rada javne rasvjete, osim u slučajevima štednje električne energije i drugim vanrednim okolnostima.

(3) Korisnik je dužan ukloniti reklamni natpis ili ga zamijeniti novim ako je: napukla ploča na kojoj je ispisan reklamni natpis, ako su pojedina slova nečitljiva, ili je ista oštećena nabilo koji

drugi način. Korisnik je dužan reklamni natpis dovesti u ispravno stanje u roku od sedam dana od dana nastanka oštećenja.

#### **Član 20.**

##### **(Uklanjanje reklamnih natpisa u slučaju prestanka rada ili preseljenja)**

(1) U slučaju prestanka rada ili preseljenja u drugu poslovnu prostoriju, vlasnik reklamnog natpisa dužan je da ga ukloni u roku od 15 dana od dana prestanka poslovanja, a mjesto gdje je bio istaknut reklamni natpis, da dovede u prvobitno stanje.

(2) Ako vlasnik reklamnog natpisa ne postupi u skladu sa obavezom iz stava (1) ovog člana, uklanjanje reklamnog natpisa izvršit će Služba za komunalne djelatnosti, vode i zaštitu okoliša, o trošku vlasnika.

#### **Član 21.**

##### **(Reklamiranje zvučnim signalima)**

Reklamiranje zvučnim signalima pod kojim se podrazumijeva zvukovno oglašavanje prepoznatljivo za pojedinog prodavača, može se vršiti u vremenu od 8 - 14 sati i od 17 - 21 sati, u skladu sa odredbama Zakona o zaštiti od buke Unsko-sanskog kantona ("Službeni glasnik USK-a", broj: 3/13).

#### **Član 22.**

##### **(Postavljanje i održavanje plakata i oglasa)**

(1) Plakati, oglasi i druge objave reklamno-promotivnog ili informativnog karaktera ili obilježja, mogu se na javnim površinama postavljati samo na oglasnim pločama, oglasnim stubovima, oglasnim konstrukcijama i u oglasnim ormarićima.

(2) Postavljanje i održavanje oglasnih ploča, oglasnih stubova, oglasnih konstrukcija i oglasnih ormarića vrši JKP „Komrad“ d.o.o. Bihać.

(3) Mjesto postavljanja, oblik i veličinu oglasnih ploča, oglasnih stubova, oglasnih konstrukcija i oglasnih ormarića određuje Služba za urbanističko planiranje i građenje.

(4) Zabranjeno je prljati, oštećivati ili uništavati oglasne ploče, oglasne stubove, oglasne konstrukcije i oglasne ormarić, te postavljene plakate oglase i slične objave.

(5) Zabranjeno je postavljanje plakata, oglasa i sličnih objava i ispisivanje poruka bilo kog sadržaja na fasadama, stalnim ogradama, potpornim zidovima, drveću, rasvjetnim

stubovima, energetskim i drugim postrojenjima i sličnim objektima, kao i na trotoarima.

(6) Plakate, oglase i slične objave postavljene van dozvoljenih mjesta, uklonit će po nalogu komunalne inspekcije fizičko ili pravno lice, koje ih je postavilo.

(7) Ukoliko fizičko ili pravno lice, koje je postavilo plakate, oglase i slične objave van dozvoljenih mjesta ne postupi po nalogu inspekcije, uklanjanje će izvršiti JKP "Komrad" d.o.o. Bihać, o trošku fizičkog ili pravnog lica, koje ih je postavilo.

#### **Član 23.**

##### **(Javni satovi)**

(1) Javni satovi se mogu postaviti na trgovima, većim raskrsnicama i na fasadama zgrada u vlasništvu Grada Bihaća.

(2) Postavljanje i održavanje javnih satova vrši JKP „Komrad“ d.o.o. Bihać, prema urbanističko-tehničkim uslovima utvrđenim od strane Službe za urbanističko planiranje i građenje.

(3) Javni satovi iz stava (1) ovog člana moraju biti uredni i ispravni.

(4) Zabranjeno je oštećivanje, šaranje, prljanje, premještanje, plakatiranje i lomljenje javnih satova.

#### **Član 24.**

##### **(Telefonske govornice i poštanski sandučići)**

(1) Telefonske govornice i poštanski sandučići postavljaju se na javnim površinama i drugim mjestima prema programu pravnih lica koje obavljaju djelatnost PTT usluga i telekomunikacija, a prema urbanističko-tehničkim uslovima utvrđenim od strane Službe za urbanističko planiranje i građenje.

(2) Telefonske govornice i poštanske sandučiće postavlja i održava urednim i ispravnim pravno lice koja obavlja djelatnost PTT usluga i telekomunikacija.

(3) U slučaju trajnog oštećenja i neupotrebljavanja telefonskih govornica i poštanskih sandučića zbog dotrajalosti i nefunkcionalnosti, pravna lica iz stava (1) ovog člana dužna su iste ukloniti, kako se ne bi narušavao urbani izgled sredine u kojoj se nalaze.

(4) Zabranjeno je oštećivanje, šaranje, prljanje, premještanje, plakatiranje i lomljenje telefonskih govornica i poštanskih sandučića.

### **Član 25. (Ukrasne žardinjere)**

(1) Na javnim površinama mogu se postavljati posude (žardinjere i saksije) sa ukrasnim biljem i cvijećem.

(2) Posude iz stava (1) ovog člana redovno održava, nadopunjuje i obnavlja JKP „Komrad“ d.o.o. Bihać.

(3) Zabranjeno je oštećivanje, šaranje, premještanje, i lomljenje ukrasnih žardinjera.

(4) Pravna ili fizička lica koja postavljaju žardinjere ispred privatnih objekata uz javne saobraćajne površine, dužna su iste redovno čistiti i održavati.

### **Član 26. (Pokretne naprave)**

(1) Pokretne naprave iz člana 2. stav (2) ove Odluke postavljaju se na javnim i privatnim površinama na osnovu odobrenja Službe za komunalne djelatnosti, vode i zaštitu okoliša, kojim se definišu način i uslovi postavljanja pokretnih naprava.

(2) Kriteriji i način postavljanja pokretnih naprava iz člana 2. stav (2) ove Odluke na javnim površinama definisani su odredbama Odluke o privremenom korištenju javnih površina na području grada Bihaća («Službeni glasnik Grada Bihaća», br. 4/15) i Planom lokacija za korištenje javnih površina na području grada Bihaća („Službeni glasnik Grada Bihaća“, br. 4/15, 6/15, 14/15, 6/16).

### **Član 27. (Postavljanje pokretnih naprava)**

(1) Pokretne naprave postavljaju se tako da svojim položajem i smještajem što bolje odgovore svrsi i namjeni za koje se postavljaju, i to:

- a) na onim mjestima na kojima se u skladu sa njihovom namjenom neće stvarati suvišna buka, nečistoća,
- b) da ne umanjuju estetski izgled mjesta na kojem su postavljene
- c) da ne ugrožavaju sigurnost saobraćaja i kretanje pješaka
- d) da njihovo postavljanje ne uzrokuje uništavanje javnih površina.

(2) Pokretne naprave i njihova okolina moraju se držati urednim i u ispravnom stanju.

(3) Zabranjeno je oštećivanje, šaranje, prljanje, premještanje, plakatiranje i lomljenje pokretnih naprava.

(4) Na pokretnim napravama zabranjeno je izlaganje i prodaja, te prezentiranje alkohola, duhana, duhanskih preradevina i drugih zakonom zabranjenih roba.

### **Odjeljak C. KOMUNALNI OBJEKTI I UREĐAJI**

#### **Član 28.**

#### **(Pojam komunalnih objekata i uređaja u općoj upotrebi)**

Komunalni objekti i uređaji u općoj upotrebi, u smislu ove Odluke, predstavljaju svu urbanu opremu koja se postavlja na javnim površinama i koja ima komunalni karakter: fontane, javne česme, table sa planom grada, korpe za otpatke, javna rasvjeta, javni i hemijski toaleti, hidranti, spomenici, spomen-ploče i skulpture.

#### **Član 29.**

#### **(Fontane i javne česme)**

(1) Na području Grada Bihaća fontane i javne česme, grade se i postavljaju na način da svojim izgledom uljepšavaju okolinu i na mjestima koja za to odredi Služba za urbanističko planiranje i građenje.

(2) O načinu rada, funkcionisanja i održavanja fontana i javnih česmi brine se JP „Vodovod“ d.o.o. Bihać.

(3) Zabranjeno je oštećivanje i nenamjenska upotreba fontana i javnih česmi, te kupanje ljudi i životinja u fontanama.

#### **Član 30.**

#### **(Table s planom grada)**

(1) U cilju lakšeg snalaženja građana u naseljima na području Grada mogu se postavljati table s planom grada.

(2) Table s planom grada postavljaju se na osnovu urbanističko-tehničkih uslova, koje utvrdi Služba za urbanističko planiranje i građenje, na mjestima na kojima se okuplja ili prolazi veći broj ljudi (na trgovima, stajalištima javnog gradskog prijevoza i slično).

(3) U planu grada moraju biti ucrtane glavne ulice, trgovci, parkovi, te najvažniji objekti (škola, dječiji vrtić, pošta, banka, zdravstvena ustanova i slično), te oznaka mjesta na kojem se tabla nalazi.

(4) Zabranjeno je oštećivanje, šaranje, prljanje, premještanje, plakatiranje i lomljenje tabla s planom grada.

### **Član 31.** **(Korpe za otpatke)**

(1) Korpe za otpatke mogu se postavljati samo na mjestima koja odredi Služba za urbanističko planiranje i građenje.

(2) Postavljanje, održavanje i zamjenu korpi za otpatke vrši JKP „Komrad“ d.o.o. Bihać.

(3) Zabranjeno je postavljanje korpi za otpatke na: stubove saobraćajne signalizacije, stubove javne rasvjete, jarbole za zastave, drveće i drugo rastinje, mjesta na kojima ometaju bezbjednost saobraćaja i druga mjesta na kojima narušavaju estetski izgled naselja.

(4) Na korpama za otpatke mogu se postavljati odgovarajući natpisi koji upozoravaju građane na zaštitu okoline i poštivanje komunalnog reda u općini.

### **Član 32.** **(Javni i hemijski zahodi)**

(1) Na mjestima na kojima se građani okupljaju i zadržavaju (na trgovima, tržnicama, autobusnim ili željezničkim stanicama i sličnim prostorima, te u parkovima, park-šumama, izletištim) mogu se graditi javni ili postavljati hemijski zahodi, a sve prema urbanističko-tehničkim uslovima koja odredi Služba za prostorno uređenje, imovinsko-pravne i geodetske poslove.

(2) Javni i hemijski zahodi moraju biti opremljeni odgovarajućom opremom, ispunjavati odgovarajuće higijenske i tehničke uslove i održavani u urednom i ispravnom stanju.

(3) Organizatori priredbi i drugih manifestacija dužni su, za vrijeme njezina trajanja postaviti hemijske zahode, u skladu sa postojećim standardima u odnosu na očekivani broj posjetitelja i vodeći računa da svojim postavljanjem ne ugrožavaju okolne objekte.

(4) Organizatori priredbi i drugih manifestacija dužni su hemijske zahode održavati urednima i čistima, te nakon završetka manifestacije ili priredbe javnu površinu dovesti u prvobitno stanje.

### **Član 33.** **(Hidranti)**

(1) Hidranti na javnim površinama moraju se održavati u ispravnom stanju, a održava ih JP „Vodovod“ d.o.o. Bihać, kome su povjereni poslovi snabdijevanja pitkom vodom.

(2) Zabranjeno je onemogućavanje pristupa, uništavanje, oštećenje ili neovlaštena upotreba hidranata.

### **Član 34.** **(Spomenici, spomen-ploče, skulpture)**

(1) Spomenici, spomen ploče, skulpture i slični objekti mogu se postavljati i uklanjati sa objekta, zemljišta i drugih prostora na području Grada Bihaća, prema prethodno pribavljenim urbanističko-tehničkim uslovima od strane Službe za urbanističko planiranje i građenje, ukoliko posebnim propisom nije drugačije određeno.

(2) Spomenici se moraju održavati urednim i zaštititi od uništavanja.

(3) Spomenike se ne smije prljati, oštećivati, uništavati, ne smije se pisati ili crtati po njima, niti na drugi način narušavati njihov izgled.

(4) Objekte iz stava (1) ovog člana dužan je održavati njihov vlasnik, odnosno lice po čijem su zahtjevu objekti postavljeni, a ukoliko to lice nije poznato ili više ne postoji, o održavanju se brine JKP „Komrad“ d.o.o. Bihać.

## **POGLAVLJE III-ODRŽAVANJE ŽELJEZNIČKIH I AUTOBUSNIH STANICA, PARKIRALIŠTA, REKREACIONIH POVRŠINA, PLAŽA, BAZENA, JAVNIH KUPALIŠTA, OBALA I KORITA RIJEKE UNE I DRUGIH VODOTOKA I PIJACA**

### **Član 35.** **(Željezničke i autobusne stanice i stajališta)**

(1) Stanične zgrade na željezničkoj i autobusnoj stanici, otvorene čekaonice, sanitarni uređaji i prostor ispred stanice, te čekaonice željezničkog, autobusnog i drugog saobraćaja i stajališta javnog prijevoza putnika i stajališta taksi prevoza, moraju biti uredne, ispravne i ispunjavati higijensko-tehničke uslove.

(2) Stajališta javnog prijevoza putnika moraju, u pravilu, biti natkrivena i opremljena klupama i korpama za otpatke.

(3) Klupe i ostali predmeti, kao i nasadi koji se nalaze na stanicama i ispred staničnih zgrada i otvorenih čekaonica moraju biti čisti, uredni i ispravni, a dotrajale i oštećene predmete i nasade, vlasnici, odnosno korisnici moraju odmah ukloniti i zamjeniti novim.

(4) Zabranjuje se ljepljenje plakata, objava, prljanje, oštećivanje i uništavanje na bilo koji

način klupa, korpa za otpatke i nadstrešnica na stajalištima na javnog prijevoza putnika.

(5) Objekte i predmete iz stava (1) i (2) ovog člana održava vlasnik, odnosno korisnik objekta ili predmeta.

### **Član 36.**

#### **(Javna parkirališta)**

(1) Lokacije za javna parkirališta određuje Gradsko vijeće svojom odlukom.

(2) O upravljanju, korištenju i održavanju javnih parkirališta brine JKP „Komrad“ d.o.o. Bihać, u skladu sa Odlukom o javnim parkiralištima na području Grada Bihaća.

### **Član 37.**

#### **(Rekreacione površine)**

(1) Rekreacione javne površine, sportska i dječija igrališta i ostali javni sportski objekti izgrađuju se prema prethodno pribavljenim urbanističko-tehničkim uslovima od strane Službe za urbanističko planiranje i građenje.

(2) Rekreacione površine iz stava (1) ovog člana održava Zavod.

(3) Pod opremom za sportska i dječija igrališta se podrazumijevaju golovi za mali nogomet i rukomet, koševi, mreža za odbojku, klackalice, ljuljačke, dječiji tobogani i slično.

(4) Dječija igrališta moraju biti odvojena ogradom od ostalog prostora, a posebno od javnih saobraćajnih površina i moraju biti opremljena igračkama i opremom, koja kod normalne upotrebe ne ugrožava sigurnost djece.

(5) Na površinama i objektima iz stava (1) ovog člana moraju na vidnom mjestu biti istaknute odredbe o održavanju reda, čistoće, zaštite zelenila i slično.

(6) Za urednost površina i ispravnost objekata iz stava (1) ovog člana, brinu se pravna lica koja tim površinama i objektima upravljaju, odnosno koja se tim površinama koriste.

(7) Zabranjeno je oštećivanje, šaranje, prljanje, plakatiranje javnih sportskih objekata, rekreacionih javnih površina, sportskih i dječijih igrališta, te premještanje i lomljenje opreme na njima.

(8) Upravljanje nad sportskim i dječijim igralištima je u nadležnosti mjesnih zajednica, u kojima su izgrađeni navedeni objekti.

### **Član 38.**

#### **(Plaže, bazeni i javna kupališta)**

(1) Uređene plaže i bazeni su javni, javno-privatni ili privatni prostori organizirani, uređeni i opremljeni urbanom opremom namijenjenom za kupanje i pružanje pratećih usluga, koji su kao takvi planirani i utvrđeni prostorno-planskom dokumentacijom i ostalim aktima u skladu sa Zakonom.

(2) Javna kupališta su otvoreni javni prostori uz obale rijeka namijenjeni za kupanje, a utvrđeni su prostorno-planskom dokumentacijom i opremljeni osnovnom urbanom opremom.

(3) Redovno održavanje i čišćenje javnih kupališta vrši Zavod.

### **Član 39.**

#### **(Obala i korita rijeke Une i drugih vodotoka)**

(1) Vlasnici, odnosno korisnici stambenih i poslovnih objekata, objekata za odmor i rekreaciju i vlasnici, odnosno korisnici zemljišta uz rijeku Unu, dužni su redovno održavati i čistiti pripadajuće obale.

(2) Vanredno čišćenje i održavanje javnih kupališta, obala i korita Une i drugih vodotoka, vrši se po nalogu nadležne inspekcije ili Službe civilne zaštite, kada zbog vremenskih neprilika, poplava ili drugih izvanrednih događaja, obale i korita vodotoka budu prekomjerno zaprljana ili onečišćena komunalnim otpadom, PET ambalažom i drugim naplavinama (polomljeno granje i panjevi, ostaci građevinskog materijala, lešine uginulih životinja, i slično), tako da time ugrožava zdravlje ljudi i značajnije utiču na vizuelnu estetiku pejzaža.

(3) Svi vlasnici malih čamaca i registrirana preduzeća za pružanje usluga raftinga na Uni, dužni su svoje čamce ustupiti za potrebe vanrednog čišćenja iz stava (2) ovog člana.

### **Član 40.**

#### **(Održavanje i čišćenje izletničkih mjesta uz obale rijeka)**

(1) Svi posjetioци i korisnici plaža i drugih izletničkih mjesta uz rijeku Unu, Klokot i druge vodotoke, obavezni su prije odlaska očistiti mjesto gdje su boravili, pokupiti sav zatečeni i nastali otpad i odložiti ga na za to predviđeno mjesto.

(2) Prije odlaska sa mjesta boravka na obalama rijeka, obavezno je provjeriti da li je ugašena vatra i očistiti mjesto gdje je vatra bila naložena.

(3) Zabranjeno je ostavljati komunalni otpad na obalama vodotoka ili ga bacati u vodotoke rijeka i potoka.

(4) Zabranjeno je deponovanje smeća na obalama rijeka i istresanje šuta u vodotoke.

(5) Zabranjeno je pranje automobila i drugih motornih vozila uz vodotoke rijeka i potoka i upotreba motornih čamaca na rijeci Uni i Klokotu, osim eko motora.

#### **Član 41. (Pijace)**

(1) Pijaca podrazumijeva određeni zatvoreni i otvoreni prostor na kojem se pružaju usluge obavljanja prometa živežnim namirnicama i drugim proizvodima.

(2) Za pijacu se određuju granice pijace, lokacija pokretnih, nepokretnih i sanitarnih uređaja i objekata na pijaci, a prema urbanističko-tehničkim uslovima, koje utvrdi Služba za urbanističko planiranje i građenje.

(3) Prodaja ili izlaganje poljoprivrednih, prehrambenih, tekstilnih, tehničkih i drugih proizvoda može se vršiti i na drugim javnim i individualnim površinama, izvan prostora pijaca, uz prethodno pribavljeno odobrenje Službe za komunalne djelatnosti, vode i zaštitu okoliša.

#### **Član 42. (Pijačni red)**

(1) Svaka pijaca mora imati Pijačni red kojeg donosi pravno lice koje upravlja i održava pijacom, uz saglasnost Gradonačelnika.

(2) Pijačnim redom utvrđuju se: radno vrijeme pijace, proizvodi koje je dozvoljeno prodavati na pijaci, šematski raspored prodajnih mjesta na pijaci, vrijeme dostave proizvoda na pijaci, čišćenje i odvoženje otpada, visina naknade za korištenje pijace i drugi elementi neophodni za rad pijace.

(3) Pijačni red mora biti istaknut na više mjesta na pijaci u zavisnosti od veličine pijace.

(4) Pravno lice, koje upravlja i održava pijacu i prodavači na pijacama, dužni su se pridržavati Pijačnog reda.

#### **Član 43. (Održavanje i čišćenje pijace)**

(1) Tržnice na malo (pijace) u Bihaću, na Trgu maršala Tita (Gradska tržnica) i u ulici Hadžiabdića mahala povjeravaju se na upravljanje i održavanje JKP „Komrad“ do.o.o. Bihać.

(2) Pravno lice koje upravlja i održava pijacu dužno je:

- a) osigurati ispravnost i čistoću opreme i uređaja na pijacama,
- b) poduzeti sve mjere da se sa pijace, u roku od jednog sata po isteku vremena određenog za rad pijace, ukloni sva roba koja je bila izložena za prodaju,
- c) svakodnevno očistiti, oprati i urediti prostor pijace, najkasnije u roku od šest sati po isteku radnog vremena pijace.

### **POGLAVLJE IV - UKRAŠAVANJE I OSVJETLJAVANJE GRADA ZA POSEBNE PRIGODE**

#### **Član 44. (Ukrašavanje i osvjetljavanje)**

(1) Povodom državnih i vjerskih praznika, te održavanja kulturnih, zabavnih, sportskih, sajamskih i drugih manifestacija, vrši se ukrašavanje i osvjetljavanje javnih površina i prostora grada i naselja.

(2) Ukrašavanje i osvjetljavanje iz stava (1) ovog člana vrši JKP „Komrad“ d.o.o. Bihać, prigodnim ukrasnim rekvizitima i to: postavljanje objekata, uređaja, pokretnih naprava, opreme, ukrasa, ukrasnih sijalica, blagdanskih i novogodišnjih drvca i slično.

(3) Prilikom dekoracije i iluminacije grada može se vršiti vanredno čišćenje, polijevanje i pranje javnih površina.

(4) Ukrasni rekviziti se uklanjaju i prostor dovodi u prvobitno stanje, najkasnije u roku od tri dana od dana prestanka prigode iz stava (1) ovog člana.

#### **Član 45. (Isticanje zastava)**

(1) U vrijeme državnih praznika, značajnih datuma i drugih svečanosti, na javnim površinama, poslovnim i stambeno-poslovnim objektima, ističu se zastave i drugi prigodni transparenti i oznake. Zastave se mogu postavljati na držače i jarbole za zastave.

(2) Vlasnici ili korisnici poslovnih, stambeno-poslovnih objekata i javnih površina dužni su istaći zastave.

(3) Zabranjeno je isticanje protivpropisno izrađenih, nečistih, pocijepanih i dotrajalih zastava.

**POGLAVLJE V- UREĐENJE VANJSKIH  
DIJELOVA ZGRADE****Član 46.****(Vanjski dijelovi zgrade)**

(1) Vlasnici, suvlasnici, odnosno korisnici zgrada i poslovnih prostora dužni su redovito održavati vanjske dijelove zgrada, u tehničkom funkcionalnom i estetskom pogledu i to: fasade, balkone, terase, lođe, vanjsku stolariju, krovove, izloge, vrata, prozore, oluke i ostalo.

(2) Vlasnici, suvlasnici i korisnici stambene, poslovne i stambeno-poslovne zgrade kojoj su vanjski dijelovi oštećeni i dotrajali, na način da su opasni po prolaznike ili da narušavaju opći izgled okoline dužni su po rješenju urbanističko-građevinskog i/ili komunalnog inspektora obnoviti vanjske dijelove zgrade u roku od najduže 12 mjeseci.

(3) Zahvati na uređenju vanjskih dijelova zgrada izvode se prema urbanističko-tehničkim uslovima, koje odredi Služba za urbanističko planiranje i građenje, uz pribavljeno odobrenje za izvođenje radova.

**Član 47.****(Uređenje vanjskih dijelova zgrade)**

(1) Zabranjeno je uništavati pročelja zgrade, te po njima ispisivati poruke, obavijesti, crtati, šarati i na drugi ih način prljati i oštećivati.

(2) Ukoliko zgrada graniči sa javnom površinom, postavljanje naprava na vanjskim dijelovima zgrade, a koje izlaze van njenih gabarita (reklame, klima uređaji, antene, tende i slično), vrši se prema urbanističko-tehničkim uslovima, koje odredi Služba za urbanističko planiranje i građenje.

(3) Klima uređaji postavljeni na vanjski dio zgrade, moraju biti ugrađeni na način da se kondenzat ne ispušta na javnu površinu.

(4) Na pročeljima zgrada, prozorima, balkonima, ogradama i drugim dijelovima zgrade, koje su orjentisane na javne površine, nije dopušteno vješanje ili izlaganje rublja, posteljine, tepiha ili drugih predmeta, gomilanje starih stvari, ostatataka namještaja i sličnih predmeta koji narušavaju estetski izgled zgrada i vidljivi su sa javne površine.

**POGLAVLJE VI- ODRŽAVANJE OGRADA,  
DVORIŠTA, VRTOVA, VOĆNJAKA I  
SLIČNIH POVRŠINA****Član 48.****(Održavanje ograda)**

(1) Ograde uz javne površine moraju biti izrađene prema urbanističko-tehničkim uslovima koje odredi Služba za urbanističko planiranje i građenje.

(2) Ograde uz javne površine moraju se održavati tako da ne predstavljaju opasnost za prolaznike, te su ih vlasnici, odnosno korisnici dužni redovito održavati (mijenjati, popravljati oštećene ili dotrajale dijelove, bojati i sl.), tako da estetski lijepo izgledaju, uklapaju se u okoliš i ne smetaju odvijanju saobraćaja i pješacima.

(3) Ograde uz javne površine ne smiju biti izvedene od bodljikave žice, šiljaka i slično. Iznimno, bodljikava žica, šiljci i slično, mogu se postaviti kao dopuna postojeće ograde samo iznad visine od 190 cm, i to tako da ne smeta prolaznicima, i da po svom položaju ne predstavlja opasnost od ozljeda.

(4) Vlasnici, odnosno korisnici ograde uz javnu površinu dužni su nakon radova na održavanju ograde očistiti javnu površinu.

(5) Vrata i kapije uličnih ograda ne smiju se otvarati prema ulici.

(6) Ograda od ukrasne živice uz javne saobraćajne površine u zoni raskrsnice mora se redovito održavati, tako da ne zaklanja saobraćajnu signalizaciju, ne umanjuje preglednost ceste, ne ulazi u gabarite ceste ili trotoara, odnosno da svojim položajem i stanjem ne ugrožava sigurnost saobraćaja.

**Član 49.****(Održavanje dvorišta, vrtova, voćnjaka)**

(1) Dvorišta, vrtove, voćnjake i druge slične površine i neizgrađena građevinska zemljišta uz javne površine vlasnici, odnosno korisnici moraju održavati i obrađivati shodno njihovoj namjeni i na taj način doprinositi uređenju grada i naselja.

(2) Održavanje dvorišta, vrtova, voćnjake i drugih sličnih površina i neizgrađenog građevinskog zemljišta uz javne površine, vrši se na način da se redovno uklanja trava, šikara i korov, režu i uklanjaju suhe grane, uklanja komunalni i građevinski otpad i da ukrasni nasadi, voćke i druga stabla svojim granama ne



prelaze na javnu površinu i ne otežavaju preglednost odvijanja saobraćaja.

(3) Lišće, cvjetove, plodove i grane koji padnu na javnu površinu vlasnici, odnosno korisnici površina iz stava (1) ovog člana dužni su odmah ukloniti, a javnu površinu očistiti.

(4) Vlasnici i korisnici površina iz stava (1) ovog člana, na kojima se nalaze alergogene biljke (ambrozija, i slično), dužni su ih uklanjati redovno, do potpunog uništenja.

(5) U naseljenim mjestima zabranjeno je paliti travu, lišće, ogranake, plastične materijale, kartonsku ambalažu i drugu vrstu komunalnog otpada.

## **DIO TREĆI - ODRŽAVANJE, ČIŠĆENJE, ČUVANJE I KORIŠTENJE JAVNIH POVRŠINA**

### **POGLAVLJE I - JAVNE SAOBRAĆAJNE POVRŠINE**

#### **Član 50.**

##### **(Održavanje javnih saobraćajnih površina)**

(1) Pod održavanjem javnih saobraćajnih površina podrazumijevaju se poslovi održavanja i modernizacije javnih saobraćajnih površina (ulice, kolovozi, pločnici, putevi, prilazi, prolazi, trgovci, trotoari, mostovi, stepeništa van zgrade, autobusna stajališta i dr.), kao i dijelova javnih cesta koji prolaze kroz naselje i ne održavaju se prema posebnim propisima, horizontalne i vertikalne signalizacije i održavanja nekategorisanih cesta.

(2) Javne saobraćajne površine iz stava (1) ovog stava održava Zavod, tako da iste budu uredne i čiste i da služe svrsi, za koje su namijenjene.

#### **Član 51.**

##### **(Čišćenje javnih saobraćajnih površina)**

(1) Čišćenje javnih saobraćajnih površina vrši JKP „Komrad“ d.o.o. Bihać.

(2) Javne saobraćajne površine kao i pristupne saobraćajne i pješačke prilaze, na kojima se održavaju manifestacije i skupovi, dužni su, tokom i nakon održavanja manifestacija i skupova, očistiti organizatori.

(3) Ako površine iz stava (2) ovog člana ne budu očišćene, po nalogu komunalnog inspektora, očistiti će ih drugo pravno lice, a na teret organizatora.

#### **Član 52.**

##### **(Vrijeme i način čišćenja javnih saobraćajnih površina)**

(1) Javne saobraćajne površine čiste se po pravilu danju, a peru noću u vremenu od 22 do 6 sati. Za pranje javnih saobraćajnih površina koristi se isključivo industrijska voda.

(2) Asfaltirane, pokockane, betonirane i popločane javne saobraćajne površine ne smiju se prati ako je vanjska temperatura zraka niža od pet stepeni C, ili ako je javna saobraćajna površina prekrivena susnježicom, snijegom ili ledom.

#### **Član 53.**

##### **(Obaveza pravnih i fizičkih lica)**

Pravna ili fizička lica koja koriste javne saobraćajne površine, vlasnici ili korisnici poslovnih, stambenih, stambeno-poslovnih objekata i zemljišta uz javnu saobraćajnu površinu, dužna su sudjelovati u čišćenju javnih saobraćajnih površina i redovno održavati čistoću trotoara, pješačkih staza, odnosno dijela ulice za pješake gdje staze ne postoje, cijelom dužinom objekta, odnosno građevinske parcele.

#### **Član 54.**

##### **(Vanredno čišćenje i održavanje javnih saobraćajnih površina)**

Vanredno čišćenje i održavanje javnih saobraćajnih površina vrši se po nalogu nadležne inspekcije ili Policijske uprave Bihać, kada zbog vremenskih neprilika, saobraćajnih nezgoda ili drugih sličnih događaja javna saobraćajna površina bude prekomjerno onečišćena ili oštećena, tako da time ugrožava sigurnost odvijanja saobraćaja.

#### **Član 55.**

##### **(Zabranjene aktivnosti na javnim saobraćajnim površinama)**

Na javnoj saobraćajnoj površini zabranjeno je:

- a) bacanje i ostavljanje otpada izvan posuda namijenjenih za otpad,
- b) bacanje gorućih predmeta u posude namijenjene za otpad,
- c) odlaganje otpadnog građevinskog materijala, zemlje i slično,
- d) popravak, servisiranje, pranje vozila i ostavljanje neispravnih vozila,
- e) ispuštanje ulja, svih vrsta otpadnih tekućina, prljavih i masnih tečnosti, boja, lakova, kreča, životinjskog izmeta, fekalija i bilo kakvih

- drugih tečnosti koje prljaju javnu saobraćajnu površinu,
- f) oštećenje posuda namjenjenih za otpad,
  - g) paljenje otpada, lišća, papira i slično,
  - h) ostavljanje i izlaganje predmeta koji mogu uprljati ili povrijediti prolaznike,
  - i) vršenje nužde, pljuvanje i slično,
  - j) prljanje, crtanje, štampanje i reklamiranje, kojima se može utjecati na bezbjednost saobraćaja.
  - k) uklanjanje, oštećenje i rekonstrukcija ivičnjaka, betoniranje i postavljanje drugih materijala između ivičnjaka i kolovoza.

#### **Član 56. (Izvođenje radova)**

Izvođenje radova na javnim saobraćajnim površinama dozvoljeno je prema urbanističko-tehničkim uslovima, koje odredi Služba za urbanističko planiranje i građenje, uz prethodno odobrenje upravitelja cesta.

#### **Član 57. (Vozila)**

(1) Vozila koja učestvuju u saobraćaju ne smiju onečišćavati javnu saobraćajnu površine, ispuštanjem ulja, benzina, rasipanjem tereta, nanošenjem blata i slično.

(2) Vozila koja prevoze tekući ili rasuti materijal moraju imati sanduke i karoserije iz kojih se materijal ne može prosipati, niti curiti.

(3) Vozila koja prevoze papir, sijeno, slamu, piljevinu, lišće i drugi rasuti materijal moraju biti prekrivena ceradom, gustom mrežom ili se na drugi način mora osigurati, da ne bi došlo do prosipanja materijala po javnoj saobraćajnoj površini.

## **POGLAVLJE II - JAVNE ZELENE POVRŠINE**

#### **Član 58. (Održavanje javnih zelenih površina i zelenih površina)**

- (1) Javne zelene površine održava Zavod.
- (2) Zelene površine održavaju:
  - a) pravno ili fizičko lice koje je vlasnik ili koje upravlja zaštićenim objektima prirode, sportskim, rekreacionim, turističkim i drugim sličnim građevinama, mezarjima-grobljima i slično, unutar tih prostora,
  - b) vlasnici ili korisnici individualnih stambenih i poslovnih objekata, u okviru ograđene okoline

objekata, odnosno pripadajuće građevinske parcele,

- c) etažni vlasnici ili korisnici stanova i poslovnih prostora u zgradama kolektivnog stanovanja na zemljištu koje služi za redovnu upotrebu objekta ili na pripadajućoj građevinskoj parceli.

(3) Pod održavanjem javnih zelenih površina i zelenih površina podrazumijeva se:

- a) obrada i priprema zemljišta,
- b) sadnja stabala, zaštitnog zelenila i drugog rastinja i sijanje trava,
- c) njega i obnova ukrasnog drveća i grmlja, cvjetnih nasada, trave i drugog zelenila,
- d) održavanje drvoreda i pojedinačnih stabala,
- e) zalijevanje nasada vodom,
- f) košenje trave i uklanjanje korova,
- g) postavljanje, sadnja i održavanje posuda sa ukrasnim biljem,
- h) okopavanje, đubrenje i prihranjivanje biljaka,
- i) sječa, orezivanje i oblikovanje stabala i grmlja,
- j) uklanjanje orezanih i sasušenih grana, otpalog granja, lišća i drugih otpadaka,
- k) postavljanje zaštitnih ograda od prikladnog materijala, odnosno sadnja živice na mjestima ugroženim od uništavanja,
- l) preventivno djelovanje na sprečavanju biljnih bolesti, uništavanje biljnih štetočina, te kontinuirano provođenje zaštite zelenila,
- m) skidanje snijega i leda sa stabala i ukrasnog grmlja,
- n) održavanje pješačkih staza, parkovskog mobilijara i druge opreme u ispravnom stanju,
- o) ostale radnje i poslovi koji su potrebni za održavanje.

(4) Zelene površine oko zgrada kolektivnog stanovanja održava Zavod, ukoliko za iste nije utvrđeno zemljište za redovnu upotrebu ili se ne može utvrditi pripadajuća građevinska parcela.

#### **Član 59. (Uređenje javnih zelenih površina na inicijativu pravnih i fizičkih lica)**

(1) Aktivnosti vezane za planiranje, oblikovanje postojećih i uređenje novih javnih zelenih površina obavlja Služba za urbanističko planiranje i građenje.

(2) Kada postoji inicijativa fizičkih ili pravnih lica da svojim radom ili sredstvima uredi javnu zelenu površinu čije uređenje nije obuhvaćeno Programom obavljanja djelatnosti zajedničke komunalne potrošnje, Služba za prostorno uređenje, imovinsko-pravne i geodetske poslove

utvrđuje uslove i način uređenja javne zelene površine.

(3) Ugovor o uređivanju javne zelene površine iz stava (2) ovog člana, zainteresovana lica zaključuju sa Zavodom.

#### **Član 60.**

##### **(Katastar javnih zelenih površina)**

(1) Radi stvaranja kvalitetne osnove za pripremu Programa obavljanja djelatnosti zajedničke komunalne potrošnje u dijelu koji se odnosi na održavanje javnih zelenih površina, Služba za imovinsko-pravne, geodetske i katastarske poslove, zajedno sa Zavodom, dužna je uspostaviti jedinstveni katastar javnih zelenih površina.

(2) Katastar javnih zelenih površina je registar sistematiziranih informacija i podataka o javnim zelenim površinama, njihovoj površini i kvaliteti, sa kartografskim prikazom.

#### **Član 61.**

##### **(Evidencija o izvršenim radovima na javnim zelenim površinama)**

(1) Radi praćenja stanja javnih zelenih površina, Zavod je dužan da uspostavi i vodi evidenciju o radovima na javnim zelenim površinama, koji su izvedeni od strane Zavoda i lica iz člana 59. stav (2) ove Odluke.

(2) Svaki investitor je dužan Zavodu blagovremeno dostaviti podatke o izvršenim radovima na javnim zelenim površinama.

(3) Dostavljeni podaci moraju sadržavati lokaciju ucrtanu na kopiji katastarskog plana, specifikaciju izvedenih radova i posadenog biljnog materijala, postavljene parkovne opreme i opreme dječijih igrališta i drugog.

#### **Član 62.**

##### **(Odgovornost za nastalu štetu)**

Ako pravna i fizička lica iz člana 58. stav (1) i (2) ove Odluke, ne ispunjavaju obaveze održavanja javnih zelenih i zelenih površina, na način kako je to propisano članom 58. stav (3) ove Odluke, snose odgovornost u slučaju nastanka štete trećim licima.

#### **Član 63.**

##### **(Održavanje stabala u blizini stambenih objekata i na privatnom zemljištu)**

(1) Stabla na javnim površinama u blizini stambenih objekata moraju se redovno održavati tako da ne smetaju stanovanju, te da u većoj mjeri ne zaklanjaju dnevno svjetlo.

(2) Stabla i grane stabala ne smiju smetati javnoj rasvjeti, vazдушnim vodovima i kablovima, saobraćajnoj signalizaciji i sigurnosti saobraćaja i prolaznika.

(3) Ukoliko grane stabala ili cijela stabla zaklanjaju ili predstavljaju smetnju normalnom funkcionisanju javnih službi ili stanovanju, grane se moraju orezivati, a stabla se moraju uklanjati.

(4) Stabla i grane koja se nalaze na zemljištu u privatnom vlasništvu pravnih ili fizičkih lica i u okolini objekata kolektivnog stanovanja, dužna su održavati vlasnici ili korisnici zemljišta, odnosno etažni vlasnici ili korisnici objekata kolektivnog stanovanja u obuhvatu prostora definiranog u čl. 58. stav (2) ove Odluke, na način da ne ugrožavaju sigurnost ljudi i imovine ili na bilo koji način ometaju odvijanje saobraćaja i prolaz pješaka.

(5) Komunalna inspekcija može po službenoj dužnosti narediti uklanjanje stabala ili orezivanje grana koja se nalaze na zemljištu u privatnom vlasništvu pravnih ili fizičkih lica, ako postoji opasnost od ugrožavanja zdravlja i nanošenja štete imovini građana ili drugih lica u roku od 7 dana od kada je konstatovana opasnost.

#### **Član 64.**

##### **(Redovno i vanredno uklanjanje stabala)**

(1) Uklanjanje stabala i grana koje ometaju saobraćajnu, vazдушnu i drugu signalizaciju, vodove i kablove, vrši pravno lice koje upravlja i održava saobraćajnu, vazдушnu i drugu signalizaciju, vodove i kablove, uz prethodno pribavljeno odobrenje Službe za komunalne djelatnosti, vode i zaštitu okoliša.

(2) Redovno uklanjanje stabala na javnim površinama vrši Zavod.

(3) Vanredno uklanjanje stabala vrši se po nalogu nadležne komunalne inspekcije i drugih nadležnih organa, u slučajevima kada je uklanjanje stabala neophodno kako bi se spriječilo ugrožavanje sigurnosti građana i njihove imovine, zbog vremenskih neprilika, nezgoda ili drugih sličnih događaja.

#### **Član 65.**

##### **(Rješenje o uklanjanju stabala)**

(1) Za uklanjanje stabala sa javne površine potrebno je odobrenje Službe za komunalne djelatnosti, vode i zaštitu okoliša, uz prethodno pribavljeno mišljenje Zavoda.

(2) Rješenjem iz stava (1) ovog člana može se utvrditi obaveza i obim zamjenske sadnje, biljna vrsta, lokacija i vrijeme izvođenja zamjenske sadnje.

(3) Obim zamjenske sadnje određuje se na osnovu promjera stabla koje se siječe.

(4) Ako zbog pomanjkanja prostora zamjenska sadnja nije moguća na mjestu uklonjenog stabla, zamjena će se izvršiti na najbližoj mogućoj lokaciji.

(5) Ukoliko se radi o endemskim vrstama drveća, prije davanja odobrenja za uklanjanje stabala, Služba za komunalne djelatnosti, vode i zaštitu okoliša dužna je zatražiti mišljenje nadležnog organa za zaštitu endemskih vrsta.

### **Član 66.**

#### **(Aktivnosti na javnim zelenim površinama za koje je potrebno odobrenje)**

Na javnim zelenim površinama može se, uz odobrenje nadležnih Službi, dozvoliti:

- a) prekopavanje javne zelene površine, uz obavezu da se skinuti humus deponira i nakon izvođenja radova vrati na javnu zelenu površinu
- b) rekonstrukcija postojećih i izgradnja novih zelenih površina,
- c) ograđivanje javnih zelenih površina i postavljanje uređaja, objekata, naprava i slično,
- d) odlaganje građevinskog materijala,
- e) kampiranje i postavljanje šatora,
- f) rezanje grana i vrhova stabala, obaranje i uklanjanje drveća, te vađenje panjeva.

### **Član 67.**

#### **(Zabranjene aktivnosti na javnim zelenim površinama)**

Radi zaštite javnih zelenih površina, zabranjeno je na javnim zelenim površinama:

- a) rezati i skidati grane i vrhove sa ukrasnog drveća i bilja,
- b) uzgajanje voćaka i povrtnih biljaka,
- c) guliti kore stabala, zasijecati, zarezivati, savijati, kidati, zabadati noževe, eksere i vijke, stavljati plakate na stabla i slično,
- d) penjati se po stablima, oštećivati i izvaljivati stabala i grmlja,
- e) neovlašteno skidati plodove sa drveća i grmlja, trgati i brati cvijeće, vaditi cvijetne travnate busenove, te kidati grane sa grmlja i drveća,
- f) oštećivati stabla raznim materijalima prilikom gradnje, utovara, istovara i dopreme građevinskog materijala, drva, ugljena i slično ložiti vatru i potpaljivati stabala,

g) rezati, odnosno prekidati korijenja stabala,

h) neovlašteno sakupljati i odnositi suho granje, kore, mladice, i zakonom zaštićeno ostalo bilje,

i) uništavati travnjake, iskopavati i odnositi zemlju, humus i biljke,

j) napasati životinje na javnim zelenim površinama,

k) oštećivati opremu (sprave za igru, ograde, opremu za rekreaciju, instalacije infrastrukture, javnu rasvjetu, klupe, korpe za otpatke i slično), te ih prljati, zagađivati i oštećivati na bilo koji način,

l) ispuštati otpadne vode, kiselinu, ulje i fekalije na javne zelene površine,

m) voziti bicikl, motocikl, automobil ili teretno motorno vozilo, osim ako se ta vozila kreću u svrhu održavanja javne zelene površine,

n) parkirati vozila,

o) prati, čistiti i popravljati vozila,

p) istovarati i skladištiti razni materijal, ogrijevno drvo, ugalj, otpadno drvo, željezo i slično,

q) bacati otpatke u bazene i fontane,

r) hvatati i uznemiravati ptice i ostale životinje, kao i skidati i oštećivati gnijezda,

s) ležati i spavati na parkovskim klupama, sjediti na naslonima klupa i na drugi način nenamjenski koristiti i oštećivati postavljenu opremu.

### **Član 68.**

#### **(Naknada štete)**

(1) Vozila parkirana na javnoj zelenoj površini ukloniće se i premjestiti na za to određeno mjesto o trošku vlasnika vozila.

(2) Lice koje svojim radnjama, upotrebom vozila i slično načini štetu na javnim zelenim površinama (zasadima, drveću, ukrasnom bilju, urbanoj opremi i dr.) obavezno je istu nadoknaditi, prema procjeni vještaka odgovarajuće struke.

## **POGLAVLJE III - KORIŠTENJE JAVNIH POVRŠINA ZA OSTALE NAMJENE**

### **Član 69.**

#### **(Korištenje javnih površina za utovar, istovar i smještaj građevinskog i drugog materijala, te za druge namjene)**

(1) Javne površine ili neizgrađeno građevinsko zemljište mogu se privremeno koristiti za utovar, istovar, i smještaj građevinskog materijala, podizanje skela, polaganje tračnica za kran i druge građevinske mašine, popravku vanjskih dijelova zgrade i slične građevinske radove, u

skladu sa propisima o bezbjednosti saobraćaja i ovom Odlukom.

(2) Odobrenje za korištenje javne površine ili neizgrađenog građevinskog zemljišta za radove iz stava (1) ovog člana, na zahtjev izvođača radova ili investitora, izdaje Služba za komunalne djelatnosti, vode i zaštitu okoliša.

#### **Član 70.**

##### **(Obaveze izvođača radova)**

(1) Prilikom izvođenja radova navedenih u članu 69. ove Odluke, mora se osigurati prohodnost trotoara i kolovoza, osim u slučajevima kada to obim radova ne dozvoljava, obezbjediti alternativni prolaz pješaka i motornih vozila.

(2) Izvođač radova dužan je:

- a) čistiti javne površine oko gradilišta, od svih vrsta građevinskih i drugih materijala, blata i slično, a čije je taloženje na javnim površinama posljedica izvođenja radova iz člana 69. ove Odluke,
- b) polijevati trošni materijal (šut i slično) za vrijeme rušenja građevinskih objekata kako bi se spriječilo stvaranje prašine,
- c) čistiti ulične slivnike u neposrednoj blizini mjesta gdje se izvode radovi.

#### **Član 71.**

##### **(Zabrana izvođenja radova zbog uočenih nedostataka)**

U slučaju da se investitor, odnosno izvođač radova ne pridržava mjera navedenih u članu 70. ove Odluke, komunalna inspekcija će naložiti otklanjanje uočenih nedostataka.

#### **Član 72.**

##### **(Ograđivanje zauzete javne površine)**

(1) Zauzeti dio javne površine mora se ograditi urednom ogradom, koja se mora posebno označiti i po potrebi osvijetliti.

(2) Građevinski materijal na gradilištu mora biti uredno složen tako da ne spriječava oticanje oborinskih voda.

#### **Član 73.**

##### **(Način korištenja zauzete javne površine)**

(1) Izvođač građevinskih radova dužan je osigurati da se zemlja na gradilištu ne rasipa, a ostali rastresiti materijal treba držati u sanducima i ogradama.

(2) Mješanje betona i maltera dozvoljeno je u posudama ili na limovima.

(3) Ako se gradnja iz bilo kog razloga na duže vrijeme obustavi, komunalna inspekcija može narediti da se sa javne površine uklone skele i drugi materijal.

(4) Javna površina se po pravilu ne može koristiti za odlaganje zemlje, šuta i drugog otpadnog građevinskog materijala, osim za onoliko materijala koliko se može odvesti u toku jednog dana.

(5) Ako se građevinski materijal odlaže uz stabla, ista se moraju zaštititi oplatom koje od kore stabla moraju biti udaljene najmanje 50 cm.

#### **Član 74.**

##### **(Vraćanje korištene javne površine u prvobitno stanje)**

(1) Izvođač radova je dužan korištenu javnu površinu vratiti u prvobitno stanje, te najkasnije 24 sata po završetku radova i uklanjanja opreme sa javne površine, obavijestiti Službu za komunalne djelatnosti, vode i zaštitu okoliša o prestanku korištenja javne površine.

(2) Komunalna inspekcija će izvršiti pregled zauzete javne površine, te ako se ustanovi da postoje oštećenja donijeti rješenje o obavezi dovodenja zauzete površine u prvobitno stanje.

#### **Član 75.**

##### **(Odlagalište otpadnog građevinskog materijala)**

(1) Investitor ili izvođač radova dužan je višak zemlje sa iskopa i otpadni građevinski materijal, odlagati na za tu svrhu predviđena odlagališta.

(2) Lokaciju i površinu za odlaganje viška zemlje iz iskopa i otpadnog građevinskog materijala privremenog i trajnog karaktera, određuje Služba za urbanističko planiranje i građenje.

(3) Zemlju i otpadni građevinski materijal odložen izvan odlagališta, uklonit će investitor ili izvođač radova po nalogu komunalne inspekcije. Ukoliko investitor ili izvođač radova ne postupi po nalogu inspekcije, uklanjanje će izvršiti JKP "Komrad" d.o.o. Bihać, o trošku investitora.

(4) Zabranjeno je odlagati zemlju i otpadni građevinski materijal na gradsku deponiju komunalnog otpada, osim u slučaju, ako se utvrdi potreba za izvođenjem određenih građevinskih radova na deponiji.

**Član 76.****(Izvođenje većih građevinskih radova)**

(1) Kod izvođenja većih građevinskih radova, Služba za komunalne djelatnosti, vode i zaštitu okoliša može posebnim aktom odrediti ulice za odvoz i dovoz građevinskog materijala.

(2) Kod izvođenja većih građevinskih radova, izvođač radova je dužan Službi za komunalne djelatnosti, vode i zaštitu okoliša dostaviti na uvid plan uređenja i organizacije gradilišta.

(3) U slučaju da se investitor, odnosno izvođač radova ne pridržava plana iz stava (2) ovog člana, komunalna inspekcija zabraniće daljnji odvoz i dovoz građevinskog materijala, dok se uočeni nedostaci ne otklone.

**Član 77.****(Utovar, istovar i odlaganje roba)**

(1) Utovar i istovar robe i drugih materijala mora se obavljati prvenstveno izvan javnih površina.

(2) U opravdanim slučajevima, radi nedostatka prostora, može se privremeno obaviti utovar i istovar robe i drugih materijala na javnim površinama, osim na mjestima gdje je to zabranjeno.

(3) Roba se mora uredno složiti, tako da ne smeta prometu i mora se ukloniti najkasnije u roku od dva sata nakon istovara.

(4) Na javnim površinama ispred poslovnih prostora ne smije se odlagati ambalaža i slično.

(5) Na javne površine koje se nalaze ispred poslovnih prostorija i skladišta, ne smije se odlagati roba bez odobrenja Službe za komunalne djelatnosti, vode i zaštitu okoliša.

**Član 78.****(Mjere za sprečavanje onečišćenja javnih površina)**

Pri obavljanju građevinskih radova, izvođači radova su dužni preduzimati sljedeće mjere za sprečavanje onečišćenja javnih površina:

- a) gradilište ograditi propisanom ogradom u visini od 2,20 m i noću osvijetliti,
- b) gradilište urediti tako se ne ometa prilaz pješaka i vozila, sa postavljenim propisanim znakovima upozorenja,
- c) postaviti na skele zaštitne zavjese od jute ili sličnih materijala,
- d) očistiti javne površine oko gradilišta, od svih vrsta građevinskog ili drugog materijala, blata i slično, a čije je taloženje na javnim površinama posljedica izvođenja radova,

e) polijevati trošni materijal za vrijeme rušenja građevinskih objekata kako bi se spriječilo stvaranje blata i prašine,

f) čistiti ulične slivnike u neposrednoj blizini gradilišta,

g) deponovati građevinski materijal u krugu gradilišta tako da se ne ometa saobraćaj i slobodno otjecanje vode, odnosno da se materijal ne raznosi po javnim površinama,

h) prati i čistiti vozila prije njihovog izlaska sa gradilišta, te polijevati i prati prilazne puteve do gradilišta,

i) nakon završetka radova, izvođač radova je dužan u roku od dva dana sa javne površine ukloniti opremu i materijal i istu dovesti u prvobitno stanje.

**Član 79.****(Odlaganje ogrjevnog materijala na javnim površinama)**

(1) Za istovar drva, uglja i sličnih materijala, te za pilanje i cijepanje drva, prvenstveno se koriste dvorišta zgrada, a samo u slučaju da ne postoji mogućnost korištenja dvorišta dozvoljeno je da se potrebni dio javne površine privremeno upotrijebi u ove svrhe, ali isključivo na način da se time ne ometa saobraćaj vozila i pješaka.

(2) Ogrjevni materijal mora se ukloniti sa javne površine najkasnije u roku od 48 sati, a upotrebljena površina mora se očistiti i oprati, a oštećenja sanirati.

(3) U zgradama u kojima postoje podrumi ili za to posebno uređene prostorije (drvarnice, šupe) ogrjevni materijal ne može se spremati na površinama oko zgrada.

(4) U zgradama u kojima ne postoje podrumi ili za to posebno uređene prostorije

(drvarnice, šupe) ogrjevni materijal se može istovariti u dvorištu stambene zgrade i složiti na tačno određena mjesta koja će utvrditi Služba za urbanističko planiranje i građenje.

(5) Zabranjeno je gomilanje, cijepanje drva i razbijanje uglja u stanovima, zajedničkim prostorijama i prostorima zgrade.

**POGLAVLJE IV – PREKOPAVANJE JAVNIH POVRŠINA****Član 80.****(Prekopavanje javnih površina)**

(1) Prekopavanje javnih površina vrši se radi gradnje, rekonstrukcije, sanacije, zamjene ili uklanjanja podzemnih instalacija, TV i kablovskih vodova, komunalne i druge

infrastrukture, te postavljanja kablovskog i zračnog priključka na nisko-naponsku i telefonsku mrežu, priključka na komunalnu infrastrukturu (snabdijevanje pitkom vodom, odvodnja otpadnih voda, plinovod i drugo), kao i nadzemnih objekata (stubovi, reklamni panoi, table i slično) i radi otklanjanja kvara na istim.

(2) Javne površine mogu se prekopavati na zahtjev izvođača ili investitora radova, uz prethodno pribavljeno mišljenje Zavoda, a na osnovu odobrenja Službe za komunalne djelatnosti, vode i zaštitu okoliša.

(3) Zahtjev za izdavanje rješenja iz stava (2) ovog člana, mora sadržavati opis radova, vrijeme potrebno za obavljanje radova i zauzimanje javne površine, tehničku dokumentaciju, kao i prijedlog privremene regulacije saobraćaja ukoliko se zbog radova mora ograničiti saobraćaj.

#### **Član 81.**

##### **(Rješenje o odobravanju prekopa)**

(1) Rješenjem kojim se odobrava prekop odredit će se trajanje radova na izvršenju i sanaciji prekopa, način zauzimanja javne površine, vrijeme izvođenja radova, način postupanja sa materijalom iz iskopa, postojećim instalacijama, sadnim materijalom i slično, privremena regulacija saobraćaja, rok i mjere koje izvođač, odnosno investitor mora poduzeti radi dovođenja javne površine u prvobitno stanje, te visina naknade koju je podnosilac zahtjeva dužan platiti.

(2) Visina naknade iz stava (1) ovog člana utvrđena je Odlukom o privremenom korištenju javnih površina na području grada Bihaća („Službeni glasnik Grada Bihaća“, br: 4/15).

#### **Član 82.**

##### **(Obavještanje vlasnika postojećih instalacija)**

Podnosilac zahtjeva za izdavanje odobrenja za prekopavanje javne površine (investitor ili izvođač radova), po pribavljenom odobrenju od Službe za komunalne djelatnosti, vode i zaštitu okoliša, dužan je obavjestiti vlasnike ostalih podzemnih instalacija, o mjestu, vremenu i načinu prekopa.

#### **Član 83.**

##### **(Prekopavanje u hitnim slučajevima)**

(1) Izuzetno od člana 80. stav (2) ove Odluke, u naročito hitnim slučajevima, a radi otklanjanja kvarova koji mogu izazvati velike štete i neposrednu opasnost za živote ljudi i imovinu,

radove je moguće izvoditi i bez rješenja nadležne službe.

(2) Obaveza investitora, odnosno izvođača radova je da po sanaciji kvara, a najkasnije početkom slijedećeg radnog dana o tome obavijesti Službu za komunalne djelatnosti, vode i zaštitu okoliša i naknadno pribavi odobrenje.

#### **Član 84.**

##### **(Završetak prekopavanja)**

(1) Prilikom otpočinjanja prekopavanja javnih površina, kao i prilikom završavanja i vraćanja zemljišta u prvobitno stanje, investitor ili izvođač radova dužni su usmeno ili pismeno obavijestiti Zavod i komunalnu inspekciju.

(2) Investitor ili izvođač radova je dužan nakon završetka radova iz stava (1) ovog člana, vratiti javnu površinu u prvobitno stanje i otkloniti eventualno nastalu štetu na javnoj površini.

(3) Zavod je dužan da izvrši kontrolu vraćanja javne površine u prvobitno stanje i utvrdi eventualne nedostatke i nastalu štetu, o čemu pismenim putem obavještava nadležnu komunalnu inspekciju.

(4) Nadležna komunalna inspekcija će investitoru ili izvođaču radova naložiti dovođenje korištene površine u prvobitno stanje i otklanjanje eventualnih nedostataka i nastale štete. Ukoliko investitor ili izvođač radova ne postupi po nalogu komunalne inspekcije, otklanjanje nedostataka će izvršiti JKP “Komrad“ d.o.o. Bihać, o trošku investitora ili izvođača radova.

#### **Član 85.**

##### **(Obaveza naknade štete)**

Ukoliko pri intervenciji bude prouzrokovana šteta na podzemnim ili nadzemnim instalacijama drugih vlasnika instalacija, obaveza vlasnika instalacija koji izvodi radove je da nadoknadi nastalu štetu.

#### **Član 86.**

##### **(Način prekopavanja javnih saobraćajnih površina)**

(1) Prekopavanje javnih saobraćajnih površina vrši se na osnovu rješenja upravitelja cesta.

(2) Prekopavanje javnih saobraćajnih površina vrši se po širini, u etapama, tako da jedna strana kolovoza bude osposobljena za nesmetano odvijanje saobraćaja, sa propisanim

oznakama izvođenja radova i načina odvijanja saobraćaja.

(3) Ukoliko je raskopan trotoar po širini, izvođač radova je dužan odgovarajućim sredstvima osigurati bezbjedan prolaz pješaka preko iskopa.

(4) Izvođač radova dužan je obezbjediti nesmetan prilaz poslovnim prostorima, stambenim i drugim javnim objektima.

(5) Prekopavanje javnih saobraćajnih površina u užem urbanom području grada vrši se u vremenskom periodu od 16,00 do 22,00 sata.

(6) U zimskom periodu, od petnaestog novembra tekuće godine do petnaestog marta naredne godine, ne može se vršiti prekopavanje javnih saobraćajnih površina.

(7) Izuzetno, ukoliko se radi o otklanjanju kvarova na postojećim instalacijama i objektima, prekopavanje se može vršiti i mimo vremenskog perioda navedenog u stavu (5) i (6) ovog člana, uz naknadno odobrenje upravitelja cesta.

## **DIO ČETVRTI - ODVOĐENJE ATMOSFERSKIH I DRUGIH VODA SA JAVNIH POVRŠINA**

### **Član 87.**

#### **(Odvođenje atmosferskih i drugih voda)**

(1) Ulične slivnike, kao i uređaje za odvodnju atmosferskih i drugih voda sa javnih saobraćajnih površina održava JP „Vodovod“ d.o.o. Bihać, koji je dužan redovno čistiti i održavati propusnim i ispravnim slivnike i slivničke veze, radi sprečavanja plavljenja javnih saobraćajnih površina.

(2) Zabranjeno je neovlašteno zatvaranje, nenamjensko korištenje i otuđivanje poklopaca, rešetki i drugih dijelova slivnika, šahtova, okna i ostalih otvora na javnim saobraćajnim površinama.

(3) Ulične slivnike, kao i uređaje za odvodnju atmosferskih i drugih voda ispred stambenih i poslovnih objekata u stanju funkcionalne ispravnosti dužni su održavati vlasnici ili korisnici stambenih i poslovnih objekata

### **Član 88.**

#### **(Šahtovi, okna, slivnici i kanali )**

(1) Svi otvori (šahtovi, okna i slivnici) na javnim saobraćajnim površinama moraju se izvoditi prema važećim propisima i standardima, te održavati u ispravnom stanju.

(2) Održavanje otvora (šahtova, okana, poklopaca i slično) vodovodne i kanalizacione mreže, električnih, kablovskih, telefonskih i drugih instalacija postavljenih na javnim saobraćajnim površinama, vrše pravna lica koja su vlasnici istih, a koja im služe za redovnu upotrebu.

(3) Svi otvori moraju biti zatvoreni poklopcima na kojima trebaju, po pravilu, biti sigurnosni zatvarači. Poklopci moraju biti od rebrastog i hrapavog otpornog materijala, urađeni na način da se izbjegne klizanje.

(4) Lica iz stava (2) ovog člana dužna su vršiti redovnu zamjenu dotrajalih poklopaca i postavljanje poklopaca koji nedostaju u roku od 24 sata.

(5) U vrijeme izvođenja bilo kakvih radova u otvorima, isti se moraju ograditi posebnim pregradama na način da sprečavaju prilaz prolaznicima, obilježiti vidljivim znacima upozorenja i saobraćanim znacima, te po završetku radova propisno zatvoriti.

(6) Zabranjeno je zacjevljivanje i zatrpavanje otvorenih kanala za odvodnju oborinskih voda i izgradnja prelaza preko kanala bez odobrenja Službe za urbanističko planiranje i građenje.

(7) Zabranjeno je u slivnike, uređaje za odvodnju atmosferskih i drugih voda i otvorene kanale bacati otpadni materijal, građevinski otpad, pijesak, otpad i sl.

### **Član 89.**

#### **(Zaštita javnih saobraćajnih površina)**

U cilju zaštite javnih saobraćajnih površina i održavanja komunalnog reda, zabranjuje se:

- a) svako oštećivanje, prljanje i šaranje saobraćajnih površina, trotoara, parkinga, trgova i drugih javnih površina koje služe za promet vozila i kretanje pješaka,
- b) pranje teretnih i putničkih automobila, zaprežnih kola i drugih vozila na javnim saobraćajnim površinama,
- c) oštećivanje, uništavanje i otuđivanje vodovodnih, kanalizacionih, električnih, telefonskih i drugih instalacija postavljenih na javnim saobraćajnim površinama, javnih fontana, hidranata i drugih instalacija,
- d) vršenje utovara i istovara građevinskog i drugog materijala i obavljanja drugih sličnih radnji bez prethodnog preduzimanja mjera zaštite javnih saobraćajnih površina,
- e) preduzimanje bilo kakvih radnji (prijevoz, utovar, istovar, montiranje, demontiranje



i slično), koji mogu da ugroze saobraćaj, onemogućće nesmetan prolaz građana kolovozom i trotoarom, ukoliko za takvu radnju ne postoji posebno odobrenje nadležnog organa,

- f) cijepanje i pilanje drva, razbijanje kamena i obavljanje sličnih grubih radova na kolovozu i trotoaru, kao i čišćenje snijega i leda oštrim predmetima kojim se oštećuju kolovoz i trotoari,
- g) kretanje kolovozom i trotoarom građevinskih i drugih vozila i mašina, koja na pogonskim točkovima imaju oštre metalne trake (gusjeničari) koji mogu da oštete kolovoz i trotoar,
- h) pisanje masnim bojama i lakovima raznih tekstova po kolovozu i trotoarima, ukoliko za takve radnje ne postoji posebno odobrenje nadležnog organa,
- i) postavljanje reklamnih panoa, natpisa na trotoarima, trgovima, ulicama i drugim javnim saobraćajnim površinama, ukoliko za to nema posebnog odobrenja nadležnog organa,
- j) prljanje i šaranje saobraćajnih i drugih znakova na javnim saobraćajnim površinama kao i njihovo oštećivanje, uništavanje i otuđivanje,
- k) popravak, servisiranje, pranje i ostavljanje neispravnih vozila na javnim saobraćajnim površinama,
- l) uklanjanje i oštećivanje ivičnjaka, betoniranje i postavljanje drugog materijala između ivičnjaka i kolovoza, bez odobrenja službe nadležne za prostorno uređenje i komunalne djelatnosti,
- m) ispuštanje oborinskih i krovnih voda na površinu nogostupa.

## **DIO PETI-UKLANJANJE SNIJEGA I LEDA**

### **Član 90.**

#### **(Program zimske službe)**

(1) Organizaciju zimske službe na području Grada Bihaća vrši Zavod, na osnovu Operativnog programa zimske službe koji se donosi u skladu sa Zakonom o cestama Federacije Bosne i Hercegovine („Službene novine FBiH“, br. 12/10, 16/10 i 66/13) i Pravilnikom o održavanju javnih cesta („Službene novine FBiH“, broj: 57/15).

(2) Zavod je dužan, najkasnije do 15. oktobra tekuće godine, donijeti Program zimske službe, kojim se utvrđuju prioriteti održavanja, mjesta pripravnosti, dinamika izvođenja radova,

potrebni resursi i drugi uslovi predviđeni posebnim propisima.

### **Član 91.**

#### **(Uklanjanje snijega i leda)**

(1) Snijeg se sa javnih saobraćajnih površina uklanja permanentno, u cilju stalne prohodnosti i u rokovima propisanim odredbama Pravilnika o održavanju javnih cesta („Službene novine FBiH“, broj: 57/15) i Pravilnika o prometu u zimskim uslovima („Službeni glasnik BiH“ broj: 13/07).

(2) Snijeg i led sa javnih saobraćajnih površina čiji je upravitelj cesta JU „Zavod za prostorno uređenje“ Bihać uklanja JKP „Komrad“ d.o.o. Bihać.

(3) Na ostalim javnim površinama, a u cilju osiguranja prohodnosti i nesmetanog korištenja tih površina, uklanjanje snijega i leda vrši se prema utvrđenim prioritetima iz Programa zimske službe.

(4) O uklanjanju snijega i leda sa autobusnih i željezničkih stajališta, označenih javnih parkirališta, taxi stajališta, tržnica, otvorenih pijaca i sličnih prostora, te sportskih objekata i objekata javnih institucija, brinu se pravna lica koja upravljaju tim površinama, odnosno koja te površine i objekte koriste.

(5) O uklanjanju snijega i leda s pločnika uz kioske i pokretne naprave brinu se vlasnici, odnosno korisnici kioska i pokretnih naprava.

### **Član 92.**

#### **(Obaveze Zavoda)**

Zavod je dužan da:

- a) osigura normalno odvijanje saobraćaja i kretanje pješaka na javnim saobraćajnim površinama, prema utvrđenim prioritetima iz Programa zimske službe,
- b) posipa trotoare i kolovoz dozvoljenim posipnim materijalom,
- c) čisti i po potrebi odvozi snijeg i led po prestanku padavina, prema prioritetima utvrđenim u Programu zimske službe.

### **Član 93.**

#### **(Čišćenje snijega i leda)**

(1) Snijeg i led se čiste i uklanjaju do ivice trotoara prema kolovozu, na način da se omogućći nesmetan saobraćaj i prolaz pješaka, te prilaz stambenim i poslovnim objektima i javnim institucijama.

(2) Čišćenje snijega i leda se obavlja na način da se na bilo koji način ne ošteti trotoar, ivičnjaci, kolovoz ili druga javna površina.

(3) Na trotoarima i javnim saobraćajnim površinama gdje nema trotoara, a koje služe za kretanje i zadržavanje pješaka, snijeg i led se moraju čistiti cijelom dužinom tih površina u širini potrebnoj za nesmetan prolaz pješaka, na ivicu kolovoza-bankinu i zaštitni cestovni pojas.

#### **Član 94.**

##### **(Posipanje javnih saobraćajnih površina)**

(1) Javne saobraćajne površine mogu se, radi sprečavanja nastanka leda i radi sprečavanja klizanja, posipati odgovarajućim materijalom.

(2) Zabranjeno je trotoar i kolovoz koji ima sistem odvodnje, odnosno koji je izgrađen od asfalta, betona ili kocaka, posipati materijalom granulacije promjera većeg od četiri milimetara.

(3) Zabranjeno je javne saobraćajne površine uz drvorede posipati solju, a površine uz drvorede posipaju se samo sredstvima koja imaju atest ili deklaraciju o neškodljivosti za stabla.

(4) Pravno lice koje uklanja snijeg i led s javnih saobraćajnih površina dužno je osigurati da se materijal kojim je posipana ta površina ukloni nakon prestanka radova zimskog održavanja.

#### **Član 95.**

##### **(Obaveze vlasnika ili korisnika objekata individualnog ili kolektivnog stanovanja i poslovnih objekata)**

(1) Snijeg i led na prilazu individualnim i kolektivnim stambenim i poslovnim objektima, kao i snijeg sa drveća pokraj tih objekata, koje izlazi na javne saobraćajne površine i površine koje služe za kretanje ili zadržavanje pješaka, dužni su očistiti vlasnici ili korisnici tih objekata.

(2) Vlasnici ili korisnici objekata iz stava (1) ovog člana dužni su nakon prestanka padavina očistiti snijeg i ukloniti led na pješačkim stazama, odnosno dijelu ulice za pješake gdje staze ne postoje cijelom dužinom objekta, širine potrebne za nesmetan prolaz pješaka, najviše do jednog metra prema kolovozu.

#### **Član 96.**

##### **(Čišćenje snijega i leda sa krovova)**

(1) Objekti za individualno ili kolektivno stanovanje, te poslovni objekti koji se nalaze uz javne saobraćajne površine i površine namjenjene kretanju ili zadržavanju pješaka, moraju na krovovima imati ugrađene snjegobrane.

(2) Snijeg i led sa krovova objekata iz stava (1) ovog člana, dužni su čistiti i uklanjati vlasnici ili korisnici individualnih stambenih objekata, upravitelji kolektivnih stambenih objekata i vlasnici ili korisnici poslovnih objekata.

(3) Vlasnici ili korisnici individualnih ili kolektivnih stambenih objekata i poslovnih objekata koji se grade ili su u trošnom i ruševnom stanju, obavezni su pored čišćenja snijega i leda sa krovova i postavljanja snjegobrana, postaviti posebne znakove upozorenja radi osiguranja sigurnosti za kretanje i prolaz pješaka.

#### **Član 97.**

##### **(Odgovornost za štetu)**

Lica koja su odredbama ove Odluke određena da se brinu o čišćenju i uklanjanju snijega i leda sa javnih i drugih površina, odgovaraju za štetu nastalu trećim licima zbog neispunjavanja navedenih obaveza.

#### **Član 98.**

##### **(Zabranjene aktivnosti)**

Radi zaštite i sigurnosti ljudi i imovine zabranjeno je:

- a) iznošenje i gomilanje snijega iz dvorišta, bašta i drugih slobodnih površina na ulice i trotoare,
- b) bacanje snijega i leda ispred zgrada i poslovnih objekata na ulicu,
- c) zatrpavanje snijegom i ledom slivnika i drugih otvora,
- d) deponovanje snijega i leda na javne površine,
- e) parkiranje vozila na saobraćajnicama, na ili uz trotoare, na način da se onemogućí rad zimske službe,
- f) sankanje i klizanje na javnim saobraćajnim površinama.

## **DIO ŠESTI-UPRAVLJANJE OBJEKTIMA I UREĐAJIMA JAVNE RASVJETE**

#### **Član 99.**

##### **(Upravljanje objektima i uređajima javne rasvjete)**

Pod upravljanjem objektima i uređajima javne rasvjete podrazumijeva se održavanje postojeće mreže javne rasvjete i aktivnosti koje se provode u cilju ušteda u potrošnji električne energije i smanjenju troškova održavanja objekata i uređaja javne rasvjete.

### **Član 100. (Javna rasvjeta)**

(1) Javnu rasvjetu čine stubovi javne rasvjete sa rasvjetnim tijelima postavljeni na ulicama i trgovima, autobusnim stajalištima, javnim parkinzima, mostovima, stepeništima, pothodnicima, nadhodnicima, objektima kulture i historijske vrijednosti, te prilazima do kruga objekata od posebnog društvenog značaja, kao i svijetleća tijela oko spomen objekata, vjerskih objekata i drugih objekata od javnog interesa.

(2) Javna rasvjeta mora biti izvedena u skladu sa savremenom svjetlosnom tehnikom, uzimajući u obzir značenje pojedinih dijelova grada i pojedinih javnih površina, promet i potrebe građana.

(3) Rasvjetna tijela moraju biti funkcionalna i estetski oblikovana.

### **Član 101. (Održavanje postojeće mreže javne rasvjete)**

(1) Javno komunalno preduzeće „Komrad“ d.o.o. Bihać je dužno javnu rasvjetu redovno održavati u stanju funkcionalne ispravnosti (prati, bojati, mijenjati dotrajale sijalice i slično), te osigurati da javna rasvjeta svijetli tokom cijele noći.

(2) Intenzitet i režim osvjetljenja usklađuje se sa usvojenim Programom obavljanja djelatnosti zajedničke komunalne potrošnje, na način da Zavod može, u skladu sa planiranim sredstvima i stvarnim potrebama pojedinih dijelova grada i prigradskih naselja, uvesti smanjeni intenzitet jačine osvjetljenja poslije ponoći ili primijeniti režim reduciranog intenziteta osvjetljenja.

(3) Vrijeme uključivanja i isključivanja javne rasvjete usklađuje se sa godišnjim dobima i atmosferskim prilikama.

(4) U slučaju potrebe za štednjom električne energije ili u drugim vanrednim okolnostima, Gradonačelnik će utvrditi minimum potreba osiguranja javne rasvjete.

(5) Objekti historijske i kulturne vrijednosti moraju se osvijetliti tako da njihove arhitektonske i druge vrijednosti dolaze do punog izražaja, na način da izvor svjetlosti bude zaštićen od prolaznika.

### **Član 102. (Zaštita rasvjetnih stubova i tijela)**

(1) Zabranjeno je otuđivanje, oštećivanje i uništavanje rasvjetnih stubova i rasvjetnih tijela, kao i lijepljenje i postavljanje oglasa,

obavještenja, smrtovnica, reklama i drugog reklamnog materijala na iste.

(2) Na stubove javne rasvjete mogu se u vrijeme državnih i vjerskih praznika i održavanja javnih manifestacija i drugih svečanosti, izuzetno postavljati ukrasne zastavice i svijetleći dekorativni elementi za koje je potrebna električna energija.

### **Član 103. (Postavljanje reklamnih natpisa na stubove javne rasvjete)**

(1) Postavljanje reklamnih natpisa na stubove javne rasvjete može se vršiti na osnovu odobrenja Službe za komunalne djelatnosti, vode i zaštitu okoliša, uz prethodno pribavljene urbanističko-tehničke uslove Službe za urbanističko planiranje i građenje.

(2) Lokacije na kojima se mogu postavljati reklamni natpisi na stubove javne rasvjete utvrđene su Programom lokacija za postavljanje reklamnih panoa tipa zastavica.

## **DIO SEDMI - UKLANJANJE PROTUPRAVNO POSTAVLJENIH PREDMETA**

### **Član 104. (Obaveza uklanjanja protupravno postavljenih predmeta i uređaja)**

Predmeti i uređaji koji su protupravno postavljeni na javnim površinama (ljetne bašte, kiosci, pokretne naprave, reklamni i drugi panoi, stupići, putokazi, posude za cvijeće, građevinski materijal, skele, ogrijev i slično, tehnički neispravna i neregistrirana vozila), moraju se ukloniti.

### **Član 105. (Postupak uklanjanja protupravno postavljenih predmeta i uređaja)**

(1) Rješenje o uklanjanju protupravno postavljenih predmeta i uređaja sa rokom uklanjanja, donosi komunalni inspektor.

(2) Ako vlasnik, odnosno korisnik protupravno postavljenog predmeta ili uređaja isti sam ne ukloni, odnosno ne postupi po rješenju inspektora, isti će se ukloniti prinudnim putem o trošku vlasnika ili korisnika, uključujući i troškove premještanja i skladištenja (čuvanja), a ako je došlo do oštećenja javne površine, uključujući i troškove dovođenja javne površine u prvobitno stanje.

(3) Uklonjene predmete vlasnici, odnosno korisnici su dužni preuzeti u roku od 30 dana uz namirenje nastalih troškova, u protivnom će se predmeti prodati javnim nadmetanjem radi namirenja troškova.

## **DIO OSMI – HIGIJENIČARSKA SLUŽBA, DEZINSEKCIJA I DERATIZACIJA**

### **Član 106.**

#### **(Držanje domaćih životinja)**

(1) Na užem urbanom području Grada Bihaća zabranjeno je uzgajanje i držanje domaćih životinja i zvijeri (papkara, kopitara, pernate živine i slično).

(2) Na ostalim područjima, uzgajanje i držanje životinja dozvoljeno je pod uslovom da je objekat za smještaj domaćih životinja izgrađen od čvrstog materijala, te da je izgrađena propisana vodonepropusna đubrenica sa otočnom jamom, na lokaciji koja svojim položajem ne ugrožava susjedne parcele, objekte, javne saobraćajnice, bunare, bazene, izvorišta, javne česme i slično.

### **Član 107.**

#### **(Držanje kućnih ljubimaca)**

Uslovi i način držanja kućnih ljubimaca, način držanja pasa i mačaka, kontrola njihovog razmnožavanja, kretanje kućnih ljubimaca u objektima i površinama javne namjene, način postupanja sa neregistriranim psima, napuštenim i izgubljenim životinjama na području Grada Bihaća propisani su Odlukom o načinu držanja i zaštiti pasa i mačaka kao kućnih ljubimaca („Službeni glasnik Grada Bihaća“, broj: 7/17 i 13/17).

### **Član 108.**

#### **(Obavljanje higijeničarske službe)**

(1) Higijeničarsku službu, koja podrazumijeva poslove stalnog i sigurnog uklanjanja životinja, pasa lualica, lešina životinja, određenih nejestivih nusproizvoda klanja, konfiskata i valioničkog otpada sa javnih površina obavlja JKP „Komrad“ d.o.o. Bihać.

(2) Lokaciju za stočna groblja na kojima se pokopavaju lešine životinja određuje Služba za urbanističko planiranje i građenje.

(3) Stočna groblja moraju biti ograđena i udaljena od naselja i objekata za snabdijevanje pitkom vodom u skladu sa urbanističko-tehničkim uslovima koje utvrdi nadležna služba.“

### **Član 109.**

#### **(Sistematska deratizacija i dezinfekcija)**

(1) Sistematska deratizacija podrazumijeva postavljanje odgovarajućeg mamca za uništavanje pacova, miševa i drugih glodara, te prikupljanje i odstranjivanje uginulih životinja.

(2) Sistematska dezinfekcija podrazumijeva prskanje ili zamagljivanje odgovarajućim sredstvima u cilju uništavanja komaraca, muha i drugih insekata.

(3) Sistematska deratizacija i dezinfekcija se vrši u slučajevima masovne pojave glodara i insekata koji bi mogli ugroziti zdravlje ljudi i životinja i nanijeti štetu na području grada i gradskih naselja.

### **Član 110.**

#### **(Obim, način i vrijeme deratizacije i dezinfekcije)**

(1) Sistematska deratizacija stambeno-poslovnih objekata, javnih i drugih objekata, javnih površina i kanalizacije obavlja se jedanput godišnje, a po potrebi i više puta.

(2) Sistematsku deratizaciju i dezinfekciju vrši pravno lice kome su povjereni poslovi, a koje je dužno prije početka izvođenja radova obavjestiti građane putem sredstava javnog informisanja o vremenu i načinu provođenja deratizacije i dezinfekcije sa potrebnim uputstvima o zaštiti građana i životinja.

(3) Nakon završene sistematske deratizacije, pravno lice kome su povjereni ovi poslovi, dužno je da ukloni glodare i ostatke otrova i drugih sredstava štetnih i opasnih po zdravlje ljudi i životinja.

(4) Sva fizička i pravna lica su dužna omogućiti i dozvoliti pristup, licima koja vrše deratizaciju i dezinfekciju, na sve površine na kojima se vrši sistematska deratizacija i dezinfekcija i pružiti im potrebna obavještenja.

(5) Obaveznu sistematsku deratizaciju i dezinfekciju u stambenim i poslovnim zgradama i prostorijama vrše vlasnici i korisnici stambenih i poslovnih zgrada i prostorija.

## **DIO DEVETI - MJERE ZA PROVOĐENJE KOMUNALNOG REDA**

### **Član 111.**

#### **(Nadzor nad provođenjem komunalnog reda)**

(1) Nadzor nad provođenjem komunalnog reda propisanog ovom Odlukom provodi Služba za komunalne djelatnosti, vode i zaštitu okoliša.

(2) Ako komunalni inspektor ili komunalni redar u svome radu naiđu na otpor, mogu zatražiti pomoć nadležne policijske uprave.

#### **Član 112. (Komunalni inspektor)**

(1) Komunalni inspektor je državni službenik sa posebnim ovlaštenjima.

(2) Komunalni inspektor ima iskaznicu kojom dokazuje svoje službeno svojstvo, identitet i ovlaštenja predviđena zakonom.

(3) Komunalni inspektori obavljaju poslove inspeksijskog nadzora samostalno u ime Grada, postupaju i donose akte u okviru dužnosti i ovlaštenja utvrđenih Zakonom, ovom Odlukom i drugim propisima.

(4) Fizičke i pravne osobe dužne su komunalnom inspektor u provedbi njegovih ovlaštenja omogućiti nesmetano obavljanje nadzora, pristup do prostorija, objekata, zemljišta, naprava i uređaja, dati osobne podatke i pružiti druga potrebna obavještenja o predmetima nadzora.

#### **Član 113. (Ovlaštenja komunalnog inspektora)**

(1) U obavljanju inspeksijskog nadzora komunalni inspektor je ovlašten:

- a) kontrolisati da li se komunalne usluge pružaju u skladu sa propisanim uslovima,
- b) kontrolisati stanje komunalnih objekata i uređaja,
- c) narediti otklanjanje utvrđenih nedostataka i nepravilnosti na način i u roku kako je to određeno ovom Odlukom,
- d) zabraniti preduzimanje radnji za koje smatra da su u suprotnosti sa Zakonom ili ovom Odlukom,
- e) narediti preduzimanje odgovarajućih radnji koje je subjekt nadzora bio dužan preduzeti,
- f) izdati prekršajni nalog i izreći kaznu,
- g) pokrenuti prekršajni postupak.

(2) Ako fizičke ili pravne osobe ne postupe po nalogu komunalnog inspektora, potrebne radnje obaviti će se na njihov trošak preko treće osobe.

(3) Postupak oduzimanja stvari kojima se počinio prekršaj ili stvari koje su nastale počinjenim prekršajem, izvršiti će se prema odredbama Pravilnika o postupku raspolaganja, čuvanja, prodaje ili uništenja privremno oduzete robe pri inspeksijskom nadzoru, do donošenja kantonalnog propisa.

## **DIO DESETI-RAD KOMUNALNIH REDARA**

#### **Član 114. (Komunalni redar)**

(1) Komunalni redar je namještenik koji samostalno vrši poslove komunalne kontrole nad provođenjem komunalnog reda propisanog odredbama Zakona o komunalnim djelatnostima i ove Odluke.

(2) Komunalni redar ima iskaznicu kojom dokazuje svoje službeno svojstvo, identitet i ovlaštenja predviđena Zakonom i ovom Odlukom.

(3) Komunalni redar pomaže komunalnom inspektor u vršenju poslova inspeksijskog nadzora nad provođenjem komunalnog reda propisanog Zakonom i ovom Odlukom.

#### **Član 115. (Poslovi komunalnog redara)**

Redari vrše poslove komunalne kontrole nad:

- a) uređenjem naselja,
- b) održavanjem čistoće, čuvanjem i korištenjem javnih površina,
- c) uklanjanjem snijega i leda,
- d) uklanjanjem protupravno postavljenih predmeta,
- e) postavljanjem i održavanjem urbane opreme na javnim površinama,
- f) ostalim oblastima i radnjama propisanim ovom Odlukom.

#### **Član 116. (Ovlaštenja redara)**

U vršenju komunalne kontrole nad provođenjem komunalnog reda, komunalni redari imaju pravo i obavezu da:

- a) vrše kontrole nad provođenjem komunalnog reda kod svih lica koja su prema odredbama ove Odluke odgovorna za stanje i održavanje komunalnog reda na javnim površinama,
- b) pregledaju opće i pojedinačne akte i drugu dokumentaciju koja se odnosi na vršenje komunalne kontrole iz člana 115. ove Odluke,
- c) utvrđuju identitet lica, kao i druge činjenice i okolnosti od značaja za vršenje kontrole,
- d) saslušavaju i uzimaju izjave od odgovornih i drugih lica,
- e) uzimaju u postupak prijave i zahtjeve građana i pravnih lica, te o postupanju sa njima obavještavaju podnosiocima prijave i zahtjeva,
- f) upozoravaju građane i pravna lica na ponašanje propisano ovom odlukom,

- g) obavještavaju komunalnog inspektora o slučajevima nepoštivanja i neizvršavanja odredaba ove Odluke,
- h) preduzimaju druge mjere i radnje za koje su ovlašteni u vršenju kontrole nad provođenjem komunalnog reda.

## **DIO JEDANAESTI- NADZOR**

### **Član 117. (Upravni nadzor)**

Upravni nadzor nad provođenjem odredaba ove Odluke vrši Služba za komunalne djelatnosti, vode i zaštitu okoliša.

### **Član 118. (Inspeksijski nadzor)**

Inspeksijski nadzor nad provođenjem odredaba ove Odluke vrši Služba za inspeksijske poslove putem komunalnog inspektora, kojem u vršenju inspeksijskog nadzora pomaže komunalni redar.

## **DIO DVANAESTI- KAZNENE ODREDBE**

### **Član 119. (Kazne za prekršaje pravnih lica, odgovornih lica u pravnom licu i samostalnih privrednika)**

(1) Novčanom kaznom u iznosu od 900,00 do 3.000,00 KM kaznit će se pravno lice, a u iznosu od 300,00 do 900,00 KM odgovorno lice u pravnom licu, ako postupi suprotno odredbama člana: 9., 11., 12., 13., 14., 15., 18., 19., 20., 21., 22., 23., 24., 25., 27., 29., 30., 31., 32., 33., 35., 37., 38., 39., 40., 42., 43., 44., 45., 46., 47., 48., 49., 50., 51., 52., 53., 54., 55., 56., 57., 58., 59., 60., 61., 62., 63., 64., 66., 67., 68., 69., 70., 72., 73., 74., 75., 76., 77., 78., 79., 80., 81., 82., 83., 84., 85., 86., 87., 88., 89., 90., 91., 92., 93., 94., 95., 96., 98., 101., 102., 103., 105., 106. i 110. ove Odluke.

(2) Za prekršaje utvrđene u stavu (1) ovog člana kazniće se fizičko lice, koje samostalno obavlja djelatnost ličnim radom (samostalni privrednik) novčanom kaznom u iznosu od 500,00 do 1.500,00 KM.

### **Član 120. (Kazne za prekršaje fizičkih lica)**

Novčanom kaznom u iznosu od 300,00 do 700,00 KM kaznit će se za prekršaj fizičko lice i roditelj ili staratelj malodobnog djeteta, ako postupe suprotno odredbama člana: 9., 11., 13., 14., 18., 21., 22., 23., 25., 27., 29., 31., 32., 33., 35., 37., 38., 39., 40., 42., 43., 44., 45., 46., 47.,

48., 49., 52., 53., 54., 55., 56., 57., 58., 59., 61., 62., 63., 66., 67., 68., 79., 87., 88., 89., 94., 95., 96., 98., 102., 103., 105., 106. i 110. ove Odluke.

## **DIO TRINAESTI- PRELAZNE ODREDBE**

### **Član 121. (Pijačni red)**

JKP „Komrad“ d.o.o. Bihać, kao pravno lice koje upravlja pijacom, dužno je da, u roku od trideset dana od dana stupanja na snagu ove Odluke, utvrdi prijedlog Pijačnog reda iz člana 42. ove Odluke i isti dostavi Gradonačelniku radi davanja saglasnosti.

### **Član 122. (Uspostava katastra javnih zelenih površina)**

Služba za imovinsko-pravne, geodetske i katastarske poslove će u roku od godinu dana, od dana stupanja na snagu ove Odluke, uspostaviti jedinstveni katastar javnih zelenih površina iz člana 60. ove Odluke.

### **Član 123. (Evidencija o izvršenim radovima na javnim zelenim površinama)**

JU „Zavod za prostorno uređenje“ Bihać će u roku od godinu dana, od dana stupanja na snagu ove Odluke, uspostaviti evidenciju o izvršenim radovima na javnim zelenim površinama iz člana 61. ove Odluke.

### **Član 124. (Određivanje lokacije)**

Služba za urbanističko planiranje i građenje će u roku od tri mjeseca, od dana stupanja na snagu ove Odluke, odrediti:

- a) lokaciju za odlaganje otpadnog građevinskog materijala i viška zemlje iz iskopa, iz člana 75. ove Odluke,
- b) mjesta za slaganje ogrjevnog materijala u dvorištima stambenih zgrada, u kojima ne postoje podrumi ili za to posebno uređene prostorije, iz člana 79. stav (4) ove Odluke.

### **Član 125. (Pravilnik o postupku raspolaganja, čuvanja, prodaje ili uništenja robe privremeno oduzete pri inspeksijskom nadzoru)**

Gradonačelnik će, u roku od tri mjeseca od dana stupanja na snagu ove Odluke, donijeti Pravilnik iz člana 113. stav (3), kojim će se bliže regulisati postupak raspolaganja, čuvanja, prodaje ili uništenja robe privremeno oduzete pri inspeksijskom nadzoru.







manifestacija ili prigodnih sajмова, uz prethodno pribavljeno odobrenje nadležne Službe“.

#### Član 6.

U Dijelu trećem, naziv: „POGLAVLJE II-JAVNE ZELENE POVRŠINE“, mijenja se i glasi: „POGLAVLJE II-JAVNE, ZELENE I OSTALE POVRŠINE“.

#### Član 7.

U članu 58. iza stava (4) dodaje se novi stav (5) koji glasi:

„(5) Ostale površine, u smislu ove Odluke, održavaju vlasnici ili korisnici istih.“

#### Član 8.

(1) U članu 67. naziv člana mijenja se i glasi: „Zabranjene aktivnosti na javnim zelenim i ostalim površinama“.

(2) U istom članu, iza riječi: „javne“ dodaju se riječi: „i ostale“, u odgovarajućem padežu.

(3) U istom članu dodaje se nova tačka a) koja glasi:

„a) bacanje, ostavljanje i odlaganje svih vrsta otpada van dozvoljenih mjesta i namjenskih posuda za odlaganje otpada“.

Dosadašnje tačke a) do s) postaju tačke b) do t).

#### Član 9.

Član 118. mijenja se i glasi:

#### „Član 118. (Inspeksijski nadzor)

Inspeksijski nadzor nad provođenjem odredaba ove Odluke vrši Služba za inspeksijske poslove putem komunalnog inspektora, kojem u vršenju nadzora pomaže komunalni redar i saobraćajnog inspektora.“

#### Član 10.

U članu 119. stav (1) iza brojčane oznake: „103“ dodaje se brojčana oznaka: „104“.

#### Član 11.

(1) U članu 120. brojčane oznake: „32“, „42“, „43“ i „44“ se brišu.

(2) U istom članu iza brojčane oznake: „29“ dodaje se brojčana oznaka: „30“, iza brojčane oznake: „33“ dodaje se brojčana oznaka: „34“, iza brojčane oznake: „68“ dodaje se brojčana oznaka: „69“, iza brojčane oznake: „103“ dodaje se brojčana oznaka: „104“.

#### Član 12.

Ova Odluka stupa na snagu osmog dana od dana objavljivanja u „Službenom glasniku Grada Bihaća“.

Broj: 01-02-114/21  
11. maja 2021. godine  
B i h a ć

Predsjedavajući  
Gradskog vijeća  
Zulfikar Handukić, s.r.

#### 127.

Na osnovu člana 68. stav (1), (2) i (6) Zakona o vodama (Službene novine Federacije BiH, broj: 70/06), člana 19. stav (2) Zakona o vodama („Službeni glasnik Unsko-sanskog kantona“ broj: 04/11), i člana 35. tačka c) Statuta Grada Bihaća („Službeni glasnik Grada Bihaća“, br. 13/15, 13/18), Gradsko vijeće Bihać na 11. sjednici održanoj dana 11.05.2021. godine, donijelo je:

### ODLUKU

#### O ZAŠTITI IZVORIŠTA VODE ZA PIĆE OSTROVICA I TOPLICA

#### DIO PRVI - OPĆE ODREDBE

##### Član 1.

##### (Predmet Odluke)

Odlukom o zaštiti izvorišta vode za piće Ostrovica i Toplica (u daljem tekstu: Odluka) utvrđuju se granice zone sanitarne zaštite izvorišta vode za piće Ostrovica i Toplica (u daljem tekstu: izvorišta), s kojih se vrši snabdijevanje vodom za piće potrošača na području Grada Bihaća, veličina i granice zona sanitarne zaštite na području Grada Bihaća, zaštitne mjere, nazivi organa i pravnih lica koja će sprovesti Odluku, nadzor nad sprovođenjem ove odluke, kaznene odredbe i druga pitanja od interesa za sprovođenje sanitarne zaštite izvorišta.

##### Član 2.

##### (Cilj donošenja Odluke)

Ova Odluka donosi se u cilju zaštite pitkih podzemnih voda koje se planiraju koristiti za potrebe vodosnabdijevanja šireg područja Grada Bihaća od svih vidova zagađenja i štetnih uticaja koji mogu nepovoljno djelovati na zdravstvenu ispravnost vode za piće ili na izdašnost izvorišta.

JU «ZAVOD ZA PROSTORNO UREĐENJE»

B I H A Ć

Broj:01-03/08-19-188/22

Datum: 12.01 2022. g.

13/01/22  
JKP

12.01.2022.  
04/1  
62-VX

GRADSKI ORGAN UPRAVE GRADA BIHAĆA			
PRIMJENJENO		12-01-2022	
Upravitelj	Upravitelj	Upravitelj	Upravitelj
04/1	19-5	42	

GRAD BIHAĆ  
GRADONAČELNIK

- Služba za strateško planiranje, upravljanje projektima, komunalne djelatnosti, vode i zaštitu okoliša

PREDMET: Inicijativa, dostavlja se.-

U skladu sa zaključcima sa radnog sastanka od 11.01.2022. g. podnosimo inicijativu za izmjene i dopune Odluke o komunalnom redu - Prečišćeni tekst („Službeni glasnik Grada Bihaća“, br.: 12/18 i 8/21), na način da se uvrsti odredba kojom će se regulisati naknada šteta trećim licima, za nepredviđene okolnosti koje nisu regulisane Ugovor o obavljanju komunalnih djelatnosti ZKP-a između Zavoda i JKP „Komrad“ d.o.o. Bihać, kako slijedi:

„Štete prouzrokovane trećim licima, nastale nevršenjem komunalnih djelatnosti zajedničke komunalne potrošnje iz člana 1. ove Odluke, usljed više sile i drugih nepredviđenih okolnosti koje se nisu mogle predvidjeti ugovorom o obavljanju komunalnih djelatnosti ZKP-e, spriječiti, izbjeći ili otkloniti, nadoknađuje Grad Bihać.“

S obzirom da u Odluci o komunalnom redu pojedine odredbe nisu usklađene sa zadnjim izmjenama Odluke o usklađivanju Odluke o osnivanju JKP „Komrad“ d.o.o. sa zakonom i dopunom djelatnosti od 19.09.2018. g., kojim je tom preduzeću povjereno obavljanje komunalnih djelatnosti iz člana 1. Odluke, predlažemo usaglašavanje, kako slijedi:

U članu 38. predlažemo da se u stavu (3) umjesto „Zavod“ stavi JKP „Komrad“ d.o.o. Bihać“, kojem je osnivačkim aktom povjereno „održavanje javnih površina“.

U članu 50. predlažemo izmjenu stava (2) tako da glasi:

„(2) Brigu o održavanju javnih saobraćajnih površina vodi Zavod, kao upravitelj lokalnih i nerazvrstanih cesta na području Grada Bihaća.“

U članu 51. stav (1), na kraju rečenice briše se interpunkcijski znak „tačka“, stavlja „zarez“ i tekst:

„tako da iste budu uredne i čiste i služe svrsi za koju su namijenjene.“

U članu 58. predlažemo da se u stavu (1) i (4) umjesto „Zavod“ stavi JKP „Komrad“ d.o.o. Bihać“, kojem je osnivačkim aktom povjereno „održavanje javnih površina“.

U članu 64. predlažemo da se u stavu (2) umjesto „Zavod“ stavi JKP „Komrad“ d.o.o. Bihać“, kojem je osnivačkim aktom povjereno „održavanje javnih površina“.

Napominjemo da članovi 90. i 91. sadrže Pravilnik o održavanju javnih cesta od 2015. g. i Pravilnik o prometu u zimskim uvjetima iz 2007. g., koji je prestao važiti 2020 g.

Član 92. je u cjelini u koliziji sa članom 90. stav (1) i članom 91. stav (2) Odluke, te predlažemo da se u članu 91. izmjeni stav (1) tako da glasi:

(1) „Snijeg i led se sa javnih saobraćajnih površina uklanja permanentno, u cilju stalne prohodnosti, tako da se osigura normalno odvijanje saobraćaja i kretanje pješaka, prema utvrđenim prioritetima u Programu zimske službe.

U stavu (2) predlažemo da se na kraju rečenice briše interpunkcijski znak „tačka“, stavlja „zarez“ i tekst:

„dozvoljenim posipnim materijalom, po prestanku padavina.“

S obzirom da je tekst odredbe člana 92. sadržan u predloženim izmjenama člana 91., predlažemo njegovo kompletno brisanje, jer je sada nepotreban.

*S poštovanjem!*



Direktor:

Ademir Toromanović, dipl.ing.arh.

Dostavljeno:

1. naslovu
2. direktor
3. Sektor za ITP-e
4. Sektor za EPZP-e
5. a/a